

**IZESU' KILISITO'NIMU'  
GAMAZI LAMINE' MALEKO'  
GIZINE'**

**Maleko' Gizine' Luhuvo  
Nitekumu' Gomu' Gataa'  
Gamazi**

Mene buku ne'mo nene Izesu' Kilisito' monovo danava'vemu' lo soto' neive. Izesu' soto' ine' gameneloti' api' ogo lo soto' amine'za asi mono' noso holo-ngedaa' ive Zohane' aza api' ogo evene' mono' gamazi lo-ngemo alingumu' aka vele-didoti' nene api' ogo gize neive. Ido' aza inite' muki' ogo molo ingumukisi ido' evene' apize ngimine' inite' malatikisi nene lo soto' ine'za Mataio' nehe Luka' nehe Zohane' nehe nete li soto' ani' ne'mino vai' ma lo soto' amive. Zuda ve nabalite Izesu'ni ningi gosele' angumukisi lo soto' ogo ido' alinge' nene engi' ebe'ninguti' Lomaveti ngamanilo' gizebo ve naba nete bililizave li nadii li-ngidahe nemukisi lo neive. Ido' helavo gamene seto hamo ogo vavo O'moso'mo nado do ote-dihe nemukisi lo neive.

Mene buku gizive nene gulive ma sainimi amine' neine'za gamene gala'mudati' vomine evene' nete a'mine buku nene Maleko' gizine' ve lani' ve. Mono' noso holo-ngedaa' ive Zohaneki ido' aposolo Zohaneki gulive'ine ne'mino Maleko' gulive gohi ma nene Zohane' minine' ve. Ido' eze izelehi gulive nene Malia' minine'. Ido' a'mine izelehi numu've nene Zelusalemila minine' (Aposolo 12:12). Ido' Banabasiki Malekoki

ingine hamo' zuho minasine' ve. (Kolosa 4:10) Ido' evene' ma nete gilani' nene Izesu'ni analo' dave nete ve goso've ma nesi analo' dalisa navo baka' mino golise loti' izo vive nene ei' Maleko' minine' noloseive li gilani' (Maleko' 14:51-52). Gana' api' igi mono' gamazi lamine' lilisa ebe' mala vadaa nene Maleko' aza Paulole Banabasilesi maka' vani'. Maka' vani'za aza gono'ine nene olihe osu' lamido' hulo-ngedo numu'vela tibizo vine'. Ne'mine ogavo Paulo' aza gohi gamene ma ele'mizo volosa gelamine'. Banabasi' ele'mizo volosa gilinekisi Paulo' aza ele'mizo volosa gelamine'. Ne'mine igi lolize gamazi lasidi'mo Pauloki Banabasiki ingine ho'lii mini eza ema asine' (Aposolo 13:5-13, 15:37-39). Paulo' aza Silasi'ni ele'mizo Siliala vi Kilikia nivasingumu' Maleko' aza Banabasikisi Kipilo ailanila vasine'.

Alinge' nene Maleko' aza Paulokisi monisa a'midoti' nene Petelokisi monasine' (Kol 4:10, Hilemoni' 24, 2 Timoteo' 4:11, 1 Petolo' 5:11). Gamene gala'mudati' vomine evene' nete ti' li lani': Maleko' aza Petelokisi bizi monaa' asive mino Izesu' gamazi line' ido' inite' ogo molo ingumu' Petolo' laa' ine' gamazi nene gizine' ve lani'.

Mene buku nene Zuda ve minamani' heta ato' vemu' Maleko' gize-ngidive lo mo soto' o neive. Nanitekumu', aza nene Zuda veliti gamazi'inemukisi monovo'inemukisi ne'mino neive lo laa' ive minine' ve. Evene' muki' nete gilani' nene Maleko' aza Loma vetingu' mino a'mingu' Izesu' evenele zuho minani' nene Izesu' amuzo've ngelebizesamu' gizine' ve lani'.

*Mono' Noso Holo-ngedaa' Ive Zohane' Mono' Gamazi Lo-ngimine'*

*(Mataio' 3:1-12; Luka' 3:1-18; Zohane' 1:19-28)*

<sup>1</sup> O'moso'mi gipele Izesu' Kilisito' ezemu' gamazi lamine' nene gana' api' ogo soto' ine' ma ti' lo neive: <sup>2</sup> O'moso'mi gamazi lo soto' o-ngemaa' ive polohete ma gulive Isaia' aza luhuvo ma gizingu' O'moso'mo guvelesi vemu' gamazi lo-imine' nene ti' lo gize neive:

Gelezo. Naza neze gamazi lo-ngeme ngeme' ilive imiselekuvo  
aza do gomu' molo akaka vele-gedeleseive.

<sup>3</sup> Ebe' hadivelati' ve mali'mo asi naba ma ti' lo nolive:

Guvelesi ve alingumu' ve li aka've di va'va' igi di lisihe' i-dilo.

<sup>4</sup> A'mine ne'mine lido' e'meto evene' mono' noso holo-ngedaa' ive Zohane' aza misubo hadiveu' vo soto' ogo evene' ti' lo lo-ngimine': O'moso'mo lengi' lihimetine hulo-lengedelingumu' ve li lutine di velepe' izi mono' noso hilalo lo lo-ngeme ngeme' ogo minine'. <sup>5</sup> Minavo Zudaia misub-okotikisi Zelusalemi numungutikisi evene' muki' ezela vi heteli lihime'ine li soto' ikevo Zodani nosou' noso holo-ngidine'. <sup>6</sup> Zohane' aza kamela ize zopovodunu' lili' ani' genegana've ize losuvodunu' lili' ani' leti ma gopololo' izine'. Ido' noso' nite've naa' ine' nene ma'nabuso ido' himoni novozo nesi no minaa' ine'. <sup>7</sup> No mino evene' ti' lo lo soto' ogo lo-ngeme ngeme' ogo minine': Evene' mehe'nela alinge' ma nave nene nezesi nivile' o-nedosa ve naba ve. Naza a'ne'mine'mine goboni gono do-do ei' suu'veloti' nala've nesi nene gubi' ize apase hulo-delodo'

nene mo lisihe' amuve. <sup>8</sup> Naza noso holo-lingiduvoni' nene haza nosotunu' holo-lingiduve. Ne neiha a'mine ve ne'mo noso ne'mine holo-lengedeline' nene O'moso'mi Sikalahukisi ne neive.

*Zohane' Noso Holo-davo Satani'mo Izesu'ni  
Emengu' Molani' Gamazi  
(Mataio' 3:13-4:11; Luka' 3:21-22; 4:1-13)*

<sup>9</sup> A'mine gamene neu' Izesu' aza nGalilaia misubou' numuno ngomo ma Nasalete nene hulo vo hetelavo Zohane' aza Zodani nosou' holo-dine'. <sup>10</sup> Holo-davo nosouti' dizosa a'mido' ningine' nene okulumo' ne ngolo' lavo Sikalahu' ne'mo nama viluso ne'mino lulou' dizelesa nolimivo ningine'. <sup>11</sup> Ne'mine ogavo Okulumokuti' gamazi ti' lo limine': Gaza nene vo'nelo' gipe'ne hamo' nene nane. Gezemu' nene mo mulu'neu' lamine' nogiluve.

<sup>12</sup> Ido' neloti' geto Sikalahuli'mo Izesu'ni nene hadive misubou' imiselavo vine'. <sup>13</sup> Vavo a'mida nene Satani'mo emengu' molo'mo novivo gamene foti (40) vine'. Ido' a'mida nene Izesu' aza lopocho nama gaha minaa' ada neivo angelo' nete nasahili' i-dii hize ele' i-di minani' ve.

*Izesu' Aza Gono've Api' Ogo Do Alaha' Daa' Ave  
Seta've Seta've Ei' E'metilizave Lo Asi Lo-ngedo Do  
Gi'mizine'  
(Mataio' 4:12-22; Luka' 4:14-15; 5:1-11)*

<sup>14</sup> Ido' Zohane'ni nalato' huli-dikevo neivo Izesu' aza nGalilaia misubou' vo O'moso'mi gamazi lamine' lo soto' ogo ti' lo lo-ngimine'. <sup>15</sup> Gamene nene mo ogave. O'moso'mo gizebo o-ledeline' gamene alitave. Nemu' nene lingine

lutine di velepe' izi gamazi lamine' mene gili ele'vole' ilo lo lo-ngimine'.

<sup>16</sup> Ido' Izesu' aza nGalilaia noso ohuno naba'mi gahevela nomono Simoniki nakunolo Adeleaki ingine alaha' daa' asive minasinako alaha' daa' asine' golaleze'ine nene alaha' dalisa nosou' nihulasivo ningine'. <sup>17</sup> Ningo ti' lo lo-ngimine': Lingine igi ne'metilizo. Alaha' daa' nasine' ne'mini evene' di nenita iga' ilisive lo lengele'mize molaloze. <sup>18</sup> Ne'mine lavo ingine lite' li alaha' daa' asine' golaleze'ine hitiki e'meti vasine'.

<sup>19</sup> Ve sita' nene do gi'mizo ngomo ma novo aza Zebedai'o' gipele sita' Zakoboki nakunolo Zohaneki sipiu' mini alaha' daa' ani' golaleze'ine nene ongoti di lamine' nasivo ningo <sup>20</sup> asi longemavo gili me'nibo Zebedai'o'nisi agove'vesi sipiu' huli-ngimiki e'meti vasine'.

*Sikalahu' Goloso Lulou' Minive Izesu' Do Lamine' O-dine'*  
(Luka' 4:31-37)

<sup>21</sup> Ingene vi Kahanaumi numungu' mini holise' gamene naba ogavo mono' numungu' dizi Izesu' mono' gamazi apize ngimine'. <sup>22</sup> Ido' apize ngimine' gamazimu' nene vo'ine vavo upuhu' ani'. Ee, aza mono' apize ngimine' nene avo'ningeliti mono' gamazi apizi ngimaa' avete apizi ngimaa' ani' ne'mino apize ngemamo asi gamazi meleho ne'mine'mo apize ngimine' gelavo nemu' vo'ine vavo upuhu' ani' ve.

<sup>23</sup> Ne'mine nilavo a'mine mono' numu'ningu' nene ve ma minine'. A'mine ve'mi lulou' nene eveneliti luteu' do goloso oga' ive Satanilati'

sikalahu' nene minavo aza geke' lo ti' lo line':  
<sup>24</sup> Nasalete ve Izesuvo, leli' nonida mene nanimu'  
 ane. Gaza do goloso o-ledelesa abe. Geze nene  
 naza mo ningo gele nouve ma nene nane. Gaza  
 nene O'mosolati' kegeso lamine' minanive ma  
 nene nane. <sup>25</sup> Ne'mine line'za Izesu' aza elemo  
 ti' lo lo-imine': Gamazi lamo zegene' oko mino  
 evene' hulo-do lemo ogo vozo. <sup>26</sup> Ne'mine lavo  
 a'mine sikalahu' goloso nene vauve elo evene'  
 do upuho' ogo do gesevase ize-do geke' naba lo  
 lulouti' lemo vine'. <sup>27</sup> Ne'mine ogo lemo vavo  
 evene' ingine ningi upuho' igi angise oko'ningu'  
 longo' i huli volelo' melo' igi ti' li lani': Mene  
 nani suno ve. Ve mene amuzo ve mino sikalahu'  
 goloso gamazi lo-ngemavo gamazi've gili daa'  
 nave li li volelo' melo' ani'. <sup>28</sup> Ne'mine ikevo  
 guvele nene hutile' ogo nGalilaia misubou' nu-  
 mudo' namado' mone osu' line'.

*Petolo' Elenahi Izelehine Izesu' Do Lamine' O-  
 do Inite' Gizi Dave Muki' Do Lamine' O-ngidine'  
 (Mataio' 8:14-17; Luka' 4:38-41)*

<sup>29</sup> Ne'mine ogavo mono' numunguti' limi Si-  
 moniki Adeleaki numu'ningu' Zakobole Zohane-  
 lesi dizani'. <sup>30</sup> Simoni' elenahi izeleho nene  
 oko'nolo' olo' ahu' lavo ongo neivo nemu'  
 Izesu'ni geti li-imani'. <sup>31</sup> Li-imikevo aza neida  
 vo analo' do do ote-davo oko'nolo' olo' ahu' line'  
 nite' nene a'mido' geto hulo-davo lamine' gelo  
 noso' nite' gize vata' o-ngedo nasahili' o-ngidine'.

<sup>32</sup> Ido' nivenga' ho' lemavo inite' gizi davesi  
 lu'ningu' sikalahu' goloso minivesi muki' ezela  
 ngele'mizi di ika' ika' ani'. <sup>33</sup> A'mine numu-  
 doti' aleve muki' nene igi gatedo' di gese' ani'.

<sup>34</sup> Ne'mine ikevo aza inite' ato atoli'mine gizi dave muki' do lamine' o-ngedo sikalahu' goloso muki' evene' maliti lu'ninguti' ngimisele do huline'. Ido' Sikalahu' goloso ingine eze ningi lamine' igi gili nizani' nenako gamazi lamilo lo lo-ngemo ngimisele do huline' ve.

*Izesu' Mono' Lo-ngeme ngeme' Ogo nGalilaia Misubouko Mone'mo Vine'*  
(Luka' 4:42-44)

<sup>35</sup> Nedenga' go' olihe lamivo Izesu' aza oto guviseu' evene' nizamangu' vo O'mosola lo minine'. <sup>36</sup> Ti' neivo Simoni' nene gonolomotesi ingine vise' i'mi vani'. <sup>37</sup> Ningi ti' li li-imani': Evene' muki' gezemu' vise' nave. <sup>38</sup> Li-imikevo aza ti' lo lo-ngimine': Naza mono' lo soto' ogo lo-ngemelongisi numuno ebe' avito' minani' nela vukele'zo. Naza nene mo ne'mine olove losa uvoni' ve lo lo-ngimine'. <sup>39</sup> Ne'mine lo aza mono' mono' numu'ningu' mono' lo soto' o-ngeme'mo vo ido' sikalahu' goloso evene' maliti lu'ningu' dizi minani' nene ngimisele hulo'mo vo nGalilaia misubou' minani' ebe' mukiku' nene mone osu' line'.

*Izesu' Aza Ganadise Gize Dave Ma Do Lamine' O-dine'*  
(Mataio' 8:1-4; Luka' 5:12-16)

<sup>40</sup> Ido' ganadise gize dave mali'mo ezela ogosa obuvolo hize emo amuzonga lo ti' lo lo-imine': Gaza do lamine' o-nedeline' amuzokasi naine' nene naza mo gele mino do lamine' o-nedeline' lo gele nouve. Gaza do lamine' o-nedelesa gele nabe. <sup>41</sup> Ne'mine lavo Izesu' muluno hukavo ganadise gizi dave i-ngidisa'mani' inite' o-do ana

hulo molo oko'nolo' hito ti' lo lo-imine': Naza do lamine' o-gedelesa gele nouve. Nemu' gaza lamine' ozo. <sup>42</sup> Ne'mine lavo ganadise ne'mo lite' lo oko'noloti' hulo-do vavo lamine' giline'. <sup>43</sup> Lamine' gelavo Izesu' aza geto gamazi amuzo molo lo-emo imiselo nohulo ti' lo line': <sup>44</sup> Gele nabe. Gaza lamine' aine' monovo nene evene' hamokisi lo-ngemamozo. Eveneto' medelo mino O'moso inite' lehize-daa' ive ne'mo ganadise okongaloti' hulo-gedo vine' nene ningo lo soto' ogavo gaza lamine' aine' nemu' nene evenelite ningi gililizangumu' ve lo ne'mine ozo: Ganadise gizi dave ingine lamine' igi ma ize inite' ne'mine ne'mine O'moso imilisave lo Mose' lo huko lido' nene e'meto eveneto' medelo mino O'moso inite' lehize-daa' ive nene inite' ma O'moso oloku' gize emelingumu' nene do vo emezo lo lo-imine'. <sup>45</sup> Ne'mine lo lo-imine'za ve aza vo a'mine gamazi api' ogo vetete' ogo do hutile' ine'. Ne'mine ogavo nemu' nene evene' gili Izesu'ni lisilizani' o vivo aza nene numuno ebeku' soto' vamilido' ogavo haza guvisela neivo numudo' namado' ve nene ezela igivo' minani' ve.

## 2

### *Izesu' Aza Gebili Ma Do Lamine' O-dine'* (Mataio' 9:1-8; Luka' 5:17-26)

<sup>1</sup> Gamene ma ogo vavo Izesu' aza Kahanaumi numuda tibizo ogo a'mida numu'vela neivo nemu' evene' ingine gili <sup>2</sup> igi di gese' igi giki' goloso adi'mo gatedokisi vovosi ma minamine'. Ne'mine ikevo aza mono' gamazi lo-ngemo minine'. <sup>3</sup> Ti' neivo inginelati' ve sita've sita've



nete gebili ma ngakato' mili di navo evene' malite ezela ngele'mizi alisa ani'za <sup>4</sup>evene' muki' giki' ikevo ne'mo neida di vamilizani' ogavo nubito' dizi Izesu' minine' lisihelelo' numuno nubiku' bili heteli gebili ongo minine' ngaka' nene nalato' hulikevo limine'. <sup>5</sup> A'mine hulave nete ha do lamine' o-deleseive li gili ele'vole' ani' nene ningo gelo Izesu' aza gebili ve nemu' ti' lo line': Gipe'neho gei' lihimeka nene mo apase-gedekuve. <sup>6</sup> Lavo avo'ningeliti mono' apizi ngimaa' ave ma a'mida minave nete ga'ningu' ti' li gili minani': <sup>7</sup> Evene' me ve nene nanimu' ne'mine nolive. O'moso ivile' o-daa' gamazi lave. O'moso'movo' lihimete hulo-ledaa' ive ne neive li gili minani'. <sup>8</sup> Ti' li gilani' nene Izesu' aza lulouko gelo ti' lo lo-ngimine': Lingine nanimu' gatingu' ne'mine li nigilave. <sup>9</sup> Lingine nenikumu' nene sozavo' laa' neive li gilaa' nahe. Gebili nemu' lihimeka mo hulo-gedekuve luvoni' nene soza lolohe lamine' lolohe ma gilamilisave lo lapa nomivo noluvoni'za sozalo' ve minuvodini ve gebili nemu' naza oto vozo nolo-duvo oto vamivo soza luvoni' nene soto' ogavo novozo helalove lo gelo oto vozo lo ma lamuvodine. <sup>10</sup> Ne neiha O'mosolati' ve gihile naza misubouko lengi' lihimetine apase-lengedaa' amuzo do nouve luvoni' nene soza lamo mo lamineto' noluvoni' nene ningi gililizangumu' naza idise ogo molo oloni' inite' nene ningilo. Ne'mine lo gebili nemu' ti' lo lo-imine': <sup>11</sup> Ti' lo nolo-gimuve. Gaza oto ngakaka do gehu numungala vozo. <sup>12</sup> Lavo mukito' ningi nizavo geto oto ngaka've do gehu vine'. Ne'mine ine' nemu' evene' muki' ingine

golize li O'moso opo'ni li ti' li lani': Laza gomu' inite' ne'mine ma ningesamune' ve li lani'.

*Izesu' Levi'ni Asi Lo Do Gi'mizine'  
(Mataio' 9:9-13; Luka' 5:27-32)*

<sup>13</sup> Ne'mine ogavo Izesu' aza noso ohuno gahavela tibizo vine'. Vavo evene' muki' ezela ika' ika' navo aza mono' apize ngeme'mo vo minine'.

<sup>14</sup> Ne'mine o'mo novo Alahaio' gipele Levi' aza takisi moni daa' ine' opisi'veu' gono do neivo ningo ti' lo lo-imine': Gaza ne'meto ano. Ne'mine lavo aza oto e'meto vine'.

<sup>15</sup> Vi eze numu'veu' Izesulesi noso' nite' ni nizavo monovo goloso igi takisi moni daa' avesi ido' Zuda veti lou' gamazilo' e'mete lamine' isa'mave gohi ma nesi muki' e'meti vani' nenako eze izipahala zuhosi mukito' makato' noso' nite' ni minani'. <sup>16</sup> Ne'mine igi nizavo Halisaio' eveneliti mono' apizi ngimaa' ave ingine Izesu' nene takisi moni daa' avesi ido' Zuda veti lou' gamazilo' e'mete lamine' isa'mavesi noso' nite' maka' ninavo ningi izapahala zuho ti' li longo' i-ngidani': Aza takisi moni daa' ave golososi ido' lihime daa' ave lingesi maka' mini nanimu' noso' nite' ninave. <sup>17</sup> Likevo gelo Izesu' aza ti' lo lo-ngimine': Luso ve aza lamine' haza minave do lamine' o-ngedelesa osa'miha inite' gizi davemukovo' nene oga' neive. Naza a'mine a'mine ogo evene' lisihe' i minavemu' amuvoni'za evene' lihime'inesi vemu' uvoni' ve.

*Noso' Nite' Malise Ogakumu' Izesu'ni Longo' Idani'  
(Mataio' 9:14-17; Luka' 5:33-39)*

18 Gamene ma Zohane' izipahala zuhosi Halisaio' evenekisi mono'inemu' gili noso' nite' malise igi nizavo evene' linge ma Izesuda igi ti' li longo' i-dani': Zohane' izipahala zuhosi Halisaio' eveneliti izipaha'ine zuhosi ingine noso' nite' malise igi nizaha geze izipaha zuho noso' nite' malise amave. Ne nanimu' nave. 19 Longo' i-dikevo aza ti' lo lo-ngimine': Ve mali'mo vene' di imiliza gameneu' olize izo noso' nite' gize vata' ogo eze zuho molo-ngedavo ingine aza a'mingu' neivo mulumo gili-di noso' nite' malise ilizado' nehe. Ne nomive. Vene' dalosa ive a'mingu' ha neivo ma noso' nite' ngeli malise amilisave. A'mine a'mine igi naza nouvosa nene lamine' gili nizanako noso' nite' malise amilizaha 20 engi' vovo'ninguti' biluvalite neze nele'mizi di vilizani' gamene nene mo aliteleseive. A'mine gamene alitavo mulumo gilisa noso' nite' malise ilisave.

21 Ido' lavolavo gosohototi' ngomo ma huki saketi litehe hukido' mili ongotilizani' nene lavolavo gosoho' ne'mo gelelehe' ogavo saketi litehe nene naba hukalinako lavolavo ngomo ma olihe ngingili lamine' nene saketi litehelo' mili ongotisa'mave. 22 Ido' a'mine'mine igi lingine vaini noso gosoho' ne'mo meme' ize losuvodunu' lili' ani' gomise nene izo pou' lavo vaini noso nene lepo vo gomise'vesi nene goloso ogalive li vaini noso gosoho' gituho' galakala' neidi'mo nene lulu izavo gomise liteheli'mo gipu lo hukiline' o miningu' nene ma ohizi milisa'mave. Vaini noso gosoho' gituho' galakala' neivo nene meme' ize losuvo gosohotunu' lili' ani' gomise

gosohoku' nene ohizeso' o neive. Ne'mine line' nene aza mono' lo-ngemaa' ine' nene gosoho' nenako izipahala zuho igi mili ilizani' monovo ne'mo a'mine Zuda veti monovo litehe malo' vo damingumu' nene line' ve.

*Holiseku' Izesu' Izipahala Zuho Viti Godololati' Gihile Ili Ni'mi Vani'*

*(Mataio' 12:1-8; Luka' 6:1-5)*

<sup>23</sup> Holise' gamene mau' Izesu' izipahala zuhosi viti mingu' nivavo izipahala zuhote viti godololati' gihile ili ni'mi vani'. <sup>24</sup> Ne'mine i'mi vani' nemu' Halisaio' evene' malite Izesu'ni ti' li li- imani': Ningezo. Leze lou' gamaziteu' nene holise' gameneu' gono damilo li nizani' mako ne'mine nanimu' nave. <sup>25</sup> Likevo aza ti' lo lo-ngimine': Davidi' eze evenele zuhosi noso' nite'ine nomivo ga'na hili nizado' aza inite' ine' nemu' gati gilisa'mahe. <sup>26</sup> Ado' Abiatala' eveneto' medelo mino O'moso inite' lehize-daa' ive naba minine' gameneu' Davidi' aza O'moso'mi numungu' dizo O'moso'mi velelo' milaa' ani' beleti nene do azasi maka' monavesi ngemavo nani'. A'mine beleti nene haza ve namilizave li eveneto' medeli mini O'moso inite' lehize-daa' avetevo' nalizave li li hukikani' beleti nene gopo nani' ma ve. <sup>27</sup> Ne'mine lo ti' lo lo-ngimine': O'moso'mo evene' do soto' molani' nene holise' gamene hize ele' ilizangumu' ve lo do soto' molani' nomive. Asi holise' gamene ne'mo nene evene' hize ele' o-ngedaa' ilive losa evenekumu' do soto' molani' ve. <sup>28</sup> Nemu' nene naza O'mosolati' ve gihile naza nene holiseli'mi melehosi mino a'mine holiseku' iliza initekumu' ido' amiliza initekumu' laa' uve nene nenikovo' nouve lo line' ve.

### 3

*Izesu' Aza Ana Goloso O Vive Ma Do Lamine' O-dine'*  
(Mataio' 12:9-14; Luka' 6:6-11)

<sup>1</sup> Mino mono' numungu' gohi dizine'. A'mida ve ma ana hamo' ma goloso ogo gilizevo o vine' nene omo neivo <sup>2</sup> evene' ma nete holise' gamene neinako Izesu' do lamine' o-deline' nene holisekumu' lani' lou' gamazi ma nene avuto' oloseinako nemu' goni' o-delone li ningilisa gizebo igi minani'. <sup>3</sup> Ti' igi nizavo Izesu' aza ana goloso o vivemu' ti' lo line': Vovoteu' ote minezo. <sup>4</sup> Lo evene' longo' o-ngidine': Leze lou' gamazite ne'mo nadive lo neive. Holise' gameneu' nene monovo lamine' ilo lo neihe. Monovo goloso ilo lo neive. Ado' evene' di lamine' i-ngidilo lo neihe. Evene' ngibili hililo lo neive lo longo' ogo line'za gamazi di tibizi lamavo <sup>5</sup> izebolo' molavo vele do eza ema ogo vonu' goloso ngebelo lu'ine ga'ine ngi lo tile vine' minangumu' mulumo'ine ningengidine'. Ne'mine ogo ana goloso o vive ma nene ti' lo lo-imine': Anga do pehe lozo. Ne'mine lavo ana do pehe lavo gohi lamine' ine'. <sup>6</sup> Ne'mine ogavo Halisaio' evene' ingine limi bililizani' aka di soto' ilisa a'mido' geti Helode' zuhosi mulise mili gamazi di hamo' ani'.

*Izesu' Noso Gahevela Neivo Evene' muki' Ezela Giki' Giki' Igi Di Gese' Ani'*

<sup>7-8</sup> Ne'mine ogavo Izesu' aza a'mine ebe' hulo izipahala zuho ngele'mizo noso ohuda limine'. Lemavo nGalilaia misubokoti' nene evene' vai' goloso e'meti ani'. Ido' evene' Zelusalemi numu-dotikisi Zudaia misubo lingelatikisi ma avo ido'

Idumaia misubokotikisi ma avo ido' Zodani noso helalatikisi ma avo ido' linge ma Tilo numudotikisi Sidoni numudotikisi ani'. A'mine evene' vai' goloso ani' nete Izesu' ogo molo minine' inite' nemu' nene gilani' nenako nemu' ezela ani'.<sup>9</sup> Ne'mini ikevo di gese' ave ingine giki' giki' igi di langolo' i-nidikelizave lo sipi ma di igi di mili-nidilo lo izipahala zuho lo-ngimine'.<sup>10</sup> Ido' sipiu' minelove line' nene nemu' line' ve: Evene' muki' do lamine' o-ngedo miningumu' nene inite' gizi dave vai' ingine oko'nolo' do geelone li ezela igi oko'nido' oko'nido' igi di langolo' i-dilizani' ine'.<sup>11</sup> Ido' ne'mine navo evene' lu'ningu' minani' sikalahu' goloso nete eze ningi gizenela limi ingi geke' naba li ti' li lika' lika' igi minani': Gaza O'moso'mi gipele ma ne nane.<sup>12</sup> Likevo aza nene ne'mo ma ve li neze monovo li soto' soto' igi li-ngimamilo lo amuzo molo lo huko lo-ngimine'.

*Izesu' Izipahala Tuvelu (12) Do Kegeso Do gi'mizine'*

*(Mataio' 10:1-4; Luka' 6:12-16)*

<sup>13</sup> Ido' Izesu' aza gololo' dizo ei' gala gilido' evene' ma vise lo-ngemavo ezela ani'.<sup>14</sup> Ikevo aza ve tuvelu do kegeso nenikisi monelone lo ido' ngimiselekuvo mono' li soto' igi li-ngimilizave.<sup>15</sup> Ido' amuzo ngemekuvo di mini evene' lu'ninguti' sikalahu' goloso ngimiselilizave lo do kegeso-ngidine'.<sup>16</sup> Do kegeso-ngidive ve tuvelu nete gulive'ine nene ne'mino neive: Simoni' gulive gohi ma nene Petolo' ve lo molo-dine'<sup>17</sup> ido' Zebedaio' gipele Zakobolesi akunolo Zohanelesi gulive'ine Boanelegesi' ve lo molo-ngidine'. Leze gamaziteuti' nene go' ngilili gili

vasine' ve losa ve. <sup>18</sup> Ido' Adelea' ido' Hilipo' ido' Batolomaio' ido' Mataio' ido' Tomasi' ido' Alahaio' gipele Zakobo' abalaho ido' Tadaio' ido' Simoni' aza Loma ve ngimiselelone lo amuzonga laa' ive nesi <sup>19</sup> ido' alinge' Izesu'ni do soto' o-do biluvaliti a'ningu' molave Kelioto ebekuti' ve Zuda' nesi nene minani' ve.

*Izesu' Lulou' Bezebulo' Neive Lani' Gamazi  
(Mataio' 12:22-32; Luka' 11:14-23; 12:10)*

<sup>20</sup> Izesu' aza numunguko vine'. Vo neivo evene' muki' gohi igi di gese' adi'mo ve'ine initekisi namani'. <sup>21</sup> Ne'mine igi nizavo eze zuho ingine gili ele'mizi alisa vani' ve. Ido' ele'mizi alisa vani' nene aza mo negi hizave li lani' nenako nemu' ele'mizi alisa vani' ve.

<sup>22</sup> Ido' avo'ningeliti mono' apizi ngimaa' ave Zelusalemi numudati' ave ingine ti' li li minani': Ve mene sikalahu' goloso ngimisele do nohuline' nene engi' guve'inesi ve naba Bezebulo' lulou' mino a'mine sikalahu' golosoliti guve'inesi ve naba ne'mo amuzo emavo nedunu' do nohuline' ve. <sup>23</sup> Ti' li nizavo Izesu' vise lo-ngemo aneza gamazi ti' lo lo-ngimine': Satani ne'mo Satani nene nado imiselelive. <sup>24</sup> Misubo mau' evene' engiku' lovo hizi vi eza ema ilizani' nene vi gopo'napa ilisave. <sup>25</sup> Ido' evene' hamo' zuho vi eza ema ilizani' nene vi gopo'napa ilisave. <sup>26</sup> A'mine a'mine igi Satani'mi zuho ingine vi eza ema igi minadini nge lami di'mozi osu' li ma minamadine.

<sup>27</sup> Evene' mali'mo ve ma gasava daa' ive miniveli'mi numu'veu' dize a'mine gasava daa'

ive'mo gizebo ogo minine' inite've ipe' ogo da-  
line' nene haza dizo ipe' ogo damoloseive. Asi  
a'mine gasava daa' ive nene gomu' ivile' ogo  
nala' do-mikosavo' nene dizo inite've ipe' ogo  
daloseive. A'mine'mine ogo naza nene Satani  
ivile' ogoosa evene' eitati' nene do nenita oga'  
nouve.

<sup>28</sup> Naza lamine' ma lo-lengemelove: Evene'  
ingine goloso nite' ato' ato' iga' ani' ne'mi lihime  
ido' O'moso divi ledivi' iga' ani' ne'mi lihime  
nene O'moso'mo ha hulo-ngedeleseiha <sup>29</sup> evene'  
mali'mo O'moso'mi Sikalahu've dovo ledevo'  
iline' ne'mi lihime nene O'moso'mo mo hulo-  
damoloseive. Aza nene imine' molo mine'mo  
vo minevo' minevo' iline' lihime daloseive lo lo-  
ngimine'.

<sup>30</sup> Ido' O'moso'mi Sikalahu' dovo  
ledevo' ogali'mi lihime O'moso'mo hulo-  
lengedamoloseive lo lo-ngimine' nene o'moso'mi  
Sikalahu' Izesu' lulou' neine' nenako evene'  
ingine sikalahu' goloso ei' lulou' neive li minani'  
nemu' nene lo-ngimine'.

*Izesu' Izelehinemukisi Akunolomotinemukisi  
Lo-ngimine'*

*(Mataio' 12:46-50; Luka' 8:19-21)*

<sup>31</sup> Ido' izelehosi akunolomotesi igi heteli heta  
oti mini ezemu' longo' ani'. <sup>32</sup> Ne'mine ikevo  
evene' muki' eze vodo vodo i-di minave nete  
ti' li li-imani': Ningezo. Izahosi nakunamote  
nesi heta imi mini gezemu' nilave. <sup>33</sup> Ne'mine  
likevo gamazi ti' lo do tibizo lo-ngimine':  
Ize'nehinemukisi naku'nemotinemukisi nilahe.  
<sup>34</sup> Ne'mine lo vele do eza ema ogo evene' vodo  
vodo i-di minave vonu' ngebelo ti' lo lo-ngimine':



Ize'nemote naku'nemote nene mene nizani' ve.  
<sup>35</sup> Evene' O'moso'mi lulolo' igi mili iga' nave engi'  
 nene ize'nemote naku'nemote ido' alu'nemote  
 ne nizave.

## 4

### *Zuho Nite' Tile' Oga' Ive'mi Aneza Gamazi (Mataio' 13:1-9; Luka' 8:4-8)*

<sup>1</sup> Izesu' noso ohuno gahevela mino gohi mono' api' ogo nolo-ngimivo evene' muki' goloso igi di gese' adi'mo aza nene nosou' minine' sipi mau' vo dizo minavo di gese' ave muki' ingine noso gahevela gepelo' minani'. <sup>2</sup> Nizavo aneza gamazi ato ato' lo-ngeme'mo novo inite' mukikumumu' apize ngimine'. Noapize ngemo gamazi ma ti' lo lo-ngimine': <sup>3</sup> Gililo. Ve ma zuho inite' tile' oga' iveli'mo zuho nite' tile' olosa vine'. <sup>4</sup> Vo tile' o'mo novivo zuho nite' linge ma nene akalo' di'mozikevo namalite igi nani'. <sup>5</sup> Linge ma nene gehedo' misubo naba minamido' di'mozi misubo naba nomine' ne'mo geti' geti' gala ho'li dizani'za <sup>6</sup> ho' nene amuzo molo lavo dizi luhive vai' damani' nenako ne'mo gulugulu izani'. <sup>7</sup> Linge ma nene gasava guvise hukikevo luhive ma ha minido' di'mozi gala ho'li dizani'za gasava guvise ne'mo dizo molo-ngedavo gihile izamani'. <sup>8</sup> Ido' linge ma misubo lamineku' di'mozi gala ho'li dizi gihile izani'. Ma ne'mo gihile teoti (30) izine'. Ma ne'mo gihile sigisiti (60) izine'. Ma ne'mo gihile vanu hadeti (100) izine'. <sup>9</sup> Ne'mine losa ti' lo line': Gatine ngolo' live nii ma nene gili lamine' ilo.

*Izesu' Aza Aneza Gamazivo' Laa' Ine' Nemu'  
Monovo Lo-ngimine'*

*(Mataio' 13:10-17; Luka' 8:9-10)*

<sup>10</sup> Evene' muki' ingine hutile' igi vikevo izipahala zuho tuvelu inginesi ido' ezesi monaa' ave linge masi engikovo' mini aneza gamazi laa' ine' monovo mamu' longo' i-dikevo <sup>11</sup> ti' lo lo-ngimine': O'moso'mo gizebo o-ledelingumu' suno' gamazi nene lengi' ha gililisave lavo lo soto' o-lengemaa' nouvoni'za lelikisi monamaa' ave nene aneza gamazivo' lo-ngemaa' nouve. Ne'mine nouvoni' nene polohete mali'mo gizine' gamazi ma nene inginela gihile izelive losa ne'mine oga' nouve. Ti' lo gize neive:

<sup>12</sup> Ningi ningi ningilizaha ninge lamine' amilisave.

Ido' gili gili gililizaha gili lamine' amilisave.

Nene nanitekumu' ve. Inge lu'ine di velepe' izikevo

O'moso'mo lihime'ine hulo-ngedalive losa ve.

*Zuho Nitekumu' Aneza Gamazi line' Ne'mi  
Monovo Lo-ngimine'*

*(Mataio' 13:18-23; Luka' 8:11-15)*

<sup>13</sup> Ne'mine lo ti' lo lo-ngimine': Aneza gamazi luvoni' me'mi monovo gilamahe. Ido' gilamilizani' nene aneza gamazi muki' nene nadi' igi gililizave. <sup>14</sup> Zuho nite' tile' oga' ive aza O'moso'mi gamazi nene tile' oga' neive. <sup>15</sup> Ido' gihile ma akalo' do'mozive luvoni' ne'mi monovo nene ne'mino neive: O'moso'mi gamazi nene evene' maliti lu'ningu' tile' ogavo nigilavo Sātani'mo geto ogo a'mine gamazi nene lu'ninguti' ipe' ogo do vaa' neive. <sup>16</sup> A'mine'mine ogo gihile

ma gehedo' misubo naba minamido' di'mozave  
 luvoni' ne'mi monovo nene ne'mino neive:  
 Evene' ma ingine O'moso'mo gamazi've tile'  
 ine' nene gili lite' li gili lanite' igi di go'zaa'  
 naha <sup>17</sup> a'mine gamazi ne'mo lu'ningu' luhise do  
 minelido' mini mili minamavo gamene ha'namu'  
 gili dii minisa'mave. Ido' gamene ha'na gili di  
 minisa'mani' nene ingine a'mine gamazi gili ni-  
 davo ne'mo engita geni soto' o-ngemelihe goboni  
 mala' mala' soto' o-ngemelihe. Ine' nene geti hu-  
 laa' nave. <sup>18</sup> Ido' gihile ma gasava guvise minido'  
 di'mozave luvoni' ne'mi monovo nene ne'mino  
 neive: Evene' ma ingine O'moso'mo gamazi  
 tile' ine' nene ha gilani'za <sup>19</sup> ingine oko'ine lo-  
 suvo'mi initekumu' gilaa' ido' moni henenimu'  
 gahu'ningu' oga' ido' ato ato' nite' muki' nene  
 dalone li gilaa' ani' ne'mo nene dizo O'moso'mi  
 gamazi nene molo-davo gihile izesa'mive. <sup>20</sup> Ido'  
 gihile ma misubo lamineku' di'mozave luvoni'  
 ne'mi monovo nene ne'mino neive: Evene' ma  
 ingine O'moso'mi gamazi gili lu'ningu' di go'zi  
 gili lamine' igi nizavo gihile iza' neive. Ee,  
 zuho nite' hamototi' gihile teoti (30) iza' neine'  
 ne'mino ve mala nene muki' iza' neive. Ido'  
 zuho nite' hamototi' gihile sigisiti (60) iza' neine'  
 ne'mino ve mala nene vai' goloso iza' neive. Ido'  
 zuho nite' hamototi' gihile vanu hadeti (100) iza'  
 neine' ne'mino ve mala nene vauve goloso elosa  
 iza' neive.

*Lamu Gizakumu' Aneza Gamazi*  
*(Luka' 8:16-18)*

<sup>21</sup> Ne'mine lo ti' lo lo-ngimine': Lamu ma  
 gizi misubo somodunu' molo hitelone li ido'

holomoli'mi sebengu' haleko molalone li di igi milaa' nahe. Ne nomive. Lamu gizio labana' elo minelido' holomo'velo' molalone li di igi milaa' nave. Olo. <sup>22</sup> A'mine'mine ogo inite' ma suno' mineline' nene mudise ningamavo ma minamoloseive. Mo soto' oloseive. Ido' inite' ma hito mineline' nene ningilizada omo soto' oloseive. <sup>23</sup> Gatine ngolo' live nii ma gili lamine' ilo.

<sup>24</sup> Ido' gamazi ne'minosasi ma lo-ngimine': Gamazi ma li-lingimikevo nigili ma nene gatine mili mini a'minguti' ho'li gilisa minilo. Lingine igi mili minilizani' votigilelo' nene do molo O'moso'mo hize ele' o-lengedo gohi masi imine' molo-lengedeleseive. <sup>25</sup> Ee, mono' ma do nolive nene O'moso'mo gohi ma emeleseive. Ido' mono' ma damo nolive nene eita mono' ngomosi ma noline' nene mo ipe' ogo do voloseive.

*O'moso'mo Evene'velo' Gizebo Oga' Neine' Ne'mo Naba Iline' Aka've Laza Ningamunivo Naba Oga' Neine' Nemu' Aneza Gamazi Lo-ngimine'*

<sup>26</sup> Ido' gamazi gohi ma ti' lo lo-ngimine': O'moso'mo evene'velo' gizebo iline' nene ne'mine o'mo vo nabau' voloseive: Ve mali'mo zuho nite' mi'veu' tile' ogosa <sup>27</sup> liti'muso izo go' lo neivo aza ongo oto o'mo novivo zuho nite' nene gala ngolo' lo dizine'. Dizine'za ne'mi monovo nene aza ningo gelamine' ve. <sup>28</sup> Misubo ne'mo asi've do dize-daa' neive. Api' ogo gala ngolo' lo avile ogo gihile iza' neive. <sup>29</sup> Ne'mine ogo gihile husavo ma aza huko dalone' gamene alitave lo gelo goboni ve vi hukilizave lo ngimisela' neive.

*O'moso'mo Evenelelo' Gizebo Iline' Nene Vo Naba Ilingumu' Izesu' Aza Sakave' Naba'mine Ma Minidi'mi Zuholo' Lo Molo Aneza Gamazi lo-ngimine' Gamazi*

*(Mataio' 13:31-32, 34; Luka' 13:18-19)*

<sup>30</sup> A'mine gamazilo' gohi ma imine' molo ti' lo lo-ngimine': O'moso'mo evene'velo' gizebo iline' vo naba iline' aka've nene laza nado neive lolone. Ido' inite' naniteto' lo molo lokunivo vo milise' ilive. Ido' inite' naniteto' aneza gamazi lo molo lolone. <sup>31</sup> A'mine O'moso'mi gizebo nene naba'mine sakave' zuho ne'minosa neive. A'mine nite' nene me misubouko minani' zuho nite' vaikuti' ei' nene ngomo lasolo neine'za <sup>32</sup> zuho' ikevo gala ho'lo dizo mingu' nite' muki' nene ngivile' ogo naba ogo a'nava've nene naba ogo zamu' gizavo nama nete igi a'mingu' numuno gizaa' nave lo line'.

<sup>33</sup> Ido' ne'mine aneza gamazi ato ato' muki' nene mono' ha gililizadokovo' lo-ngemo minine'. <sup>34</sup> Evene' muki' nene aneza gamazivo' lo-ngimine'za alinge' azasi izipahala zuhosi angisevo' minangu' nene gamazi monovo muki' nesi nene lo soto' ogo lo-ngemaa' ine'.

*Izesu' Lavo Hepe' Naba Matavo Noso Nene Zou Lo Minine'*

*(Mataio' 8:23-27; Luka' 8:22-25)*

<sup>35</sup> A'mine gameneu' nene nivenga' molavo Izesu' aza izipahala zuho ti' lo lo-ngimine': Noso helala holene volone. <sup>36</sup> Lavo evene' muki' di gese' igi minave nene huli-ngidi sipiu' nene ha minidokovo' ha neivo ingine ele'mizi vani'. Nivavo sipi gohi masi maka' vani'. <sup>37</sup> Nivavo hepe' naba goloso elavo ne'mo noso nene golo

gidini dizevo' dizevo' ogo sipi nene hito lulouko velo leme' leme' idi'mo sipiu' nene noso'mo vai' lolosa ine'. <sup>38</sup> Ne'mine ogo neivo Izesu' aza nene sipi isevela godololo' alese molo okise ongo minine'. Minavo izipahala zuho ingine u'muko' igi ti' li lani': Tisazo, laza nosou' mene lemo helelongumu' nene ma gelamabe. Olo. <sup>39</sup> Ne'mine likevo aza oto hepe' nene elemo noso mamu' moda ve. Hongu lozo line'. Lavo hepe' nene matavo noso nesi hongu lo zou lo minine'. <sup>40</sup> Ne'mine ogavo ti' lo lo-ngimine': Lingine golise nanimu' nigilave. O'mosomu' gili ele'vole' amahe. <sup>41</sup> Ti' lo lavo ingine ngehelele goloso izavo a'minemu' li volelo' melo' igi ti' li lani': Mene ve nene nani'mine ve neivo hepeki nosogi nene gamazi've gili dikesive.

## 5

*Izesu' Gelasa Vetida Vo Sikalahu' Goloso nGimiselo Huline'*  
(Mataio' 8:28-34; Luka' 8:26-39)

<sup>1</sup> Ne'mine ogavo ingine noso ohuno helala Gelasa vetida vi hetelani'. <sup>2</sup> Vi hetelikevo Izesu' sipiuti' lemavo sikalahu' golososi minive mali'mo gonoso mili-ngidaa' ani' geheni muli' ebekuti' ogo navo votene' asine'. <sup>3</sup> A'mine ve nene geheni muliku' ongo minaa' neivo ve mali'mosi analo' damiline' ogavo seni nalatunukisi dani' nene damine' ve. <sup>4</sup> Gamene muki' gizene analo' seni nala' izi-dani'za analo' nala' nene do huko hulo gizenelo' nala' nesi izo huko hulavo ve hamoli'mosi amuzo molo ivile' ogo do hongu lo-damilido' o minine'. <sup>5</sup> Gamene gamene holuka'

holuka' geheni mulikukisi gololokisi mino geke' geke' lo mino gehenitunu' gesebe' izo asi've oko'no nene huko minaa' ine'.

<sup>6</sup> Izesu' aza hoto' navo ningo loti' izo ogo gizeneu' gubi' ize emo <sup>7</sup> amuzo molo geke' naba lo ti' lo lo-imine': Izesuvo, O'moso dizo minive'mi gipele mene gaza nouvoda naniteka' nane. O'moso'mi gulivelo' agae lo nolo-gimuze. Mulumo gono nemamozo. <sup>8</sup> Mene gamazi line' nene Izesu' aza sikalahu' goloso gaza a'mine ve'mi lulouti' lemo vozo lo nolo-divosa line'. <sup>9</sup> Lavo Izesu' aza longo' o-do ti' lo line': Guliveka zaho nane. Longo' o-davo aza line': Laza vai' nounako gulive'ne nene Mangilise' nouve. <sup>10</sup> Ne'mine lo mene misuboukoti' limiselo mala do hulo-ledamilive lo amuzo molo zege' zegeka line'. <sup>11</sup> Ido' a'mida golola nene ize vai' goloso galese ni nizavo <sup>12</sup> sikalahu' golosolite zege' zegeka li ti' li li-imani': Agae. Izeu' volene do hulo-ledanivo lu'ningu' dizelone. <sup>13</sup> Ne'mine likevo vi a'mingu' dizilizave lo Izesu' gele ngimine'. Ne'mine ogavo sikalahu' goloso ingine a'mine ve'mi lulouti' limi izeliti lu'ningu' vi dizani'. Dizikevo ize tu tauseni (2,000) ne'mine ingine mangilise hizi loti' izi golo aveselo' nene limi noso ohunou' vi noso ni hilani' ve.

<sup>14</sup> Hilikevo ize gizebo ve nete golise vi tauni nabaukisi ido' hazalasi vetete' igi li-ngimikevo evenelite soto' ine' inite' nene ningelone li <sup>15</sup> Izesuda igi sikalahu' goloso mukikisi minive nene genegana do otuho gala gele nge losa neivo ningi ngehelele izine'. <sup>16</sup> Ido' a'mine sikalahu' goloso muki' minivelasi ido' izelasi soto' ine'

inite' ningave nete ne'mi gamazi've nene vetete' igi li-ngimikevo <sup>17</sup> engi' misubo'ine nene hulo vilive li Izesu'ni geligelinga li-dani'.

<sup>18</sup> Ne'mine li-dikevo Izesu' sipi mau' nodizivo sikalahu' golososi minive aza ezela gi'mizo monelove lo geligelinga lo lo-imine'za <sup>19</sup> Izesu' o've lo-emo ti' lo lo-imine': Gaza numungala vo Guvelesi ve gezemu' muluno hukavo inite' lamine' goloso o-gidine' ne'mi gamazi nene vetete' ogo geze eveneka zuho lo-ngemezo. <sup>20</sup> Lavo Dekapoli misubouko vo Izesu' inite' o-dingumu' nene lo soto' ogo lo-ngemavo evene' muki' gili golize lani'.

*Izesu' Zailo' Aluvosi Genegana'velo' Do Giline' Venekisi Do Lamine' O-ngidine'*  
(Mataio' 9:18-26; Luka' 8:40-56)

<sup>21</sup> Ne'mine ikevo Izesu' aza sipi' dizo noso ohuno ema helala gohi ogo noso gaheve gepelo' neivo evene' muki' goloso ezela igi di gese' ani'.

<sup>22</sup> Ne'mine ikevo Zuda veti mono' numunguti' guvelesi ve ma gulive Zailo' aza ogo Izesu'ni ningo gizeneu' gubi' ize emo <sup>23</sup> agae lo geligelinga lo ti' lo lo-imine': Neni' alune ngomo ma nene mo osu' lolosa neize. Aza nene lamine' ogo velesi lamine' ha minelingumu' ve lo gaza ogo angadunu' do geleline lo nouve. <sup>24</sup> Lo-emavo maka' nivašivo evene' vai' li e'meti nivii ezela giki' giki' igi minani'.

<sup>25</sup> Ne'mine igi nivangu' nene vene' ma vine'. A'mine vene' nene venelite ike'nilo' ike'nilo' ningaa' nani' siki nene mate-desamivo mino gamene ha'nalo' ninge do vo neivo <sup>26</sup> kilisimasi tuvelu ogo vine' ve. Ne'mino neivo luso ve muki'



nete di lamine' i-dilisa luso gizi-dangu' nene mulumo nite' muki' imi luso gizi-dikevo a'mido' nene meni ngemo inite've muki' hulo osu' line'za isine' nite' nene osu' lo-damo gohi do naba ogo minine' ve. <sup>27-28</sup> A'mine vene' nene Izesu' guvele gelosa naza oko'nolo' damo ha gene-gana'velokovo' do geleloni' nene lamine' olosuve lo giline' nenako nemu' aza evene' giki' igi mi-nangu' nene Izesu' mehenelati' ogo <sup>29</sup> anadunu' genegana'velo' do giline'. Do nogilivo a'mido' geto siki inite've minine' nene oku' lo-davo ti' lo lulou' giline': Nisine' nite' nene mo osu' lo-nedave. <sup>30</sup> Ne'mine ogavo Izesu' aza eze-lati' amuzo vine' nene ei' lulouko gelosa a'mine evene' muliseu' nene lite' lo mine velepe' izo ti' lo line': Genegana'nelo' evene' zaho do gelane. <sup>31</sup> Lavo izipahala zuho ingine ti' li li-imani': Evene' muki' nene gei' di vodo vodo i-gidi oko'nido' oko'nido' igi nivanako nenito' zaho do gilive lo nolabe. <sup>32</sup> Lani'za aza nene zaho do gilive lo ningelesa vele do eza ema ogo ninge'mo monine'. <sup>33</sup> Ninge'mo nomonivo vene' aza eita soto' o-dine' inite' mamu' gelosa golise gelo luvoluvo izo ogo Izesu' gizeneu' lemo pou' lo ongo gubi' ize emosa ei' ine' inite' nemu' nene hitamo lo soto' ogo osu' line'. <sup>34</sup> Lo-emavo aza ti' lo lo-imine': Alune ve, gaza gele ele'vole' anidi'mo nene lamine' ogange. Mulungau' hongu lo lamine' o minivo vozo. Inite' gisine' nene osu' lo-gedavo lamine' minezo.

<sup>35</sup> Ti' nolivo a'mine mono' numunguti' guvelesi ve'mi numu'velati' ma igi ti' li lani': Aluva ma mo helave. Nemu' nene gaza tisa'ni lihiteheka

lo gohi ele'mizo amozo. <sup>36</sup> Ne'mine lani'za Izesu' a'mine gamazi gele hulo mono' numunguti' guvelesi vemu' ti' lo lo-imine': Gaza gopo gaka gelamo nenikumu' gele ele'vole' ogovo' minezo. <sup>37</sup> Ti' lo losa e'metikelizave lo evene' mukikumu' nene o've lo lo huko-ngedo Petolole Zakobole Zakobo' akunolo Zohanelesi engikovo' o've longedamivo e'metani'. <sup>38</sup> Mono' numunguti' guvelesi ve'mi numudo' vi hetelikevo alungomu' gulugulunga li ive nama igi zanamana izi nizavo ningine'. <sup>39</sup> Ningo numungu' dizo ti' lo longimine': Lingine nanimu' ngeunga li ive nama igi nizave. Izipe nene helamine' haza okise ongo neive line'. <sup>40</sup> Lavo gize' i-dani'za aza muki' ngimisele hulo heto' ogo izipe'mi melehingi izelehingi ido' ezesi ave nesi ngele'mizo izipe minine' numungu' dizine'. <sup>41</sup> Dizos alungo ne'mi analo' do ti' lo lo-imine': Talita kumi, ne'mi monovo leli' gamaziti' nene ti' lo neive: Alungo ngomo, neni' nolo gimuze. Otezo. <sup>42</sup> Lavo a'mido' geto oto aka mono minine'. A'mine alu'mi kilisimasi've nene tuvelu ne'mine minine'. Ne'mine ogavo ningave ingine a'mido' geti golize goloso li minani'. <sup>43</sup> Ti' igi nizavo Izesu' aza a'mine ningani' initekumu' nene evene' hamokisi li-ngimamilo lo lo huko longemo alungo nene noso' nite' imilizave lo longimine'.

## 6

*Nasalete Aleve Ingene Izesu'ni Di Limi Lani'  
Gamazi  
(Mataio' 13:53-58; Luka' 4:16-30)*

<sup>1</sup> Izesu' aza a'mine ebe' hulo izipahala zuhosi e'meti minavo goto' numu'vela vo heteline'.  
<sup>2</sup> Holise' gamene ogavo mono' numungu' mono' apize ngemo neivo evene' muki' ingine gili golize li ti' li lani': Mene ve nene gamazi zalati' dave. Ido' ei' gamazi galau' neine' lo-limine' nene atoli'mine neinako ne'mi monovo nene nado nolive. Ato ato' nite' do soto' neine' nene nado do soto' nomolave. <sup>3</sup> Me ve nene ha Malia' gipele kamuda minive ne neive. Olo. Ido' Zakobole Zosele Zudale Simonile engi' uvo'nibo neive. Alunolo nesi nene lezesi mela none. Ne'mine li ingine mulu'ningu' goloso gilani' ve. <sup>4</sup> Ne'mine ikevo Izesu' ti' lo lo-ngimine': O'moso'mi veleti' gamazi li soto' i ngimaa' ave polohete engikumu' nene evene' muki' gilavo dizisa minaa' naha engi' misubo'ningu' aleve netesi engi' zuho gihile lamine' netesi ido' engi' numu'nine gihileu' ingaa' nave ingine netesi nene engikumu' gilavo dizesa'mine' ne'minosa nazasi nouve lo line'. <sup>5</sup> Ne'mine lo a'mida nene O'moso'mi amuzo do soto' ogo ato' nite' amiline' ogavo inite' gizi dave hamo hamokovo' anadunu' oko'nido' doka' doka' ogo do lamine' o-ngidine'. <sup>6</sup> A'mine numuda aleve ingine gili imamangumu' nene gala muki' giline'.

*Izesu' Izipahala Zuho Tuvelu nGimiselavo Mono' Gonolo' Vani' Gamazi*

Ne'mine ogavo aza numudo' numudo' mono mono' lo-ngeme ngeme' ogo minine'. <sup>7</sup> Ne'mino mine'mo novo izipahala zuho tuvelu asi lo-ngemo sikalahu' goloso ngimiseli hulilizave lo amuzo ngemo seta' seta' ngimiseline'.  
<sup>8</sup> Nongimiselo ti' lo lo-ngimine': Aka vilizada

hatuso nene ha di vilizaha inite' gohi mo di vamilo. Ado' beleti nene di vami gokisi di vami monisi go'zi di vamilo. <sup>9</sup> Suu' nene ha izi vilisaha sioti nene seta' izi vami hamokovo' izi vilo. <sup>10</sup> Ido' ne'minosasi ma lo-ngimine': Ebe' mala igi ma nene numuno hamokukovo' ingi mini a'mine ebe' hulilizani' gamenelokovo' ga' li vilizave. <sup>11</sup> Numuno malo' nivavo lengele'mize lamine' ami gamazitine gilamavo ma nene lingine huli-ngidi vilisa niigi ma nene ingine engi' monovo'ine gililizangumu' ve li avazaha igi gizedidoti' u'musupo nene okoho' izi di huli vilo. <sup>12</sup> Ne'mine lavo ingine vi evene' muki' lu'ine di velepe' izilizave li li soto' igi li-ngimi'mi vani'. <sup>13</sup> Ne'mine i'mi nivi sikalahu' goloso muki' eveneliti lu'ninguti' ngimiseli huli inite' ngisive muki' uveli noso hili-ngidi di lamine' i-ngidani' ve.

*Mono' Noso Holo-ngedaa' Ive Zohane' Hiline'  
Gamazi  
(Mataio' 14:1-12; Luka' 9:7-9)*

<sup>14</sup> Izesu' guvele nene hutile' ogo vavo guvelesi ve Helode' aza a'mine gamazi nesi giline'. Evene' linge malite Izesungumu' ti' li lani': Noso holo-ngedaa' ive Zohane' ma nene hilinguti' otave. Ne'mo nene ato ato' suno daa' amuzo nene ezela neivosa ato ato' suno nene nodaloseive. <sup>15</sup> Ne'mine lani'za ma nete gomu' polohete Elia' ma ne neive likevo ma nete polohete gozopo' minani' mauti' neive lani'. <sup>16</sup> Ne'mine lani'za Helode' aza lani' gamazi gelo ti' lo line': Neni' lu-vono gituve Zohane' ma nene gohi ote noloseive.

17-18 Ido' Zohane'nimu' line' nene nemu' line' ve: Gomu' gala'muda vomine Helode' aza akunolo Hilipo' elenaho Helodia'ni gumine dani'. Gumine davo mono' noso holo-ngedaa' ive Zohane' ne'mo akuna'mi elenahine daine' nene lisihe' amive lo Helode'ni lo-eme'mo vo minine'. Ne'mine lo lo-eme'mo vo minivo nemu' Helode' aza Helodia'nimu' ogo a'mine Zohane'ni nene vi dalizave lo evene' ma ngimiselavo vi analo' di nalava imi ele'mizi di vi nala' numungu' huli-dani'. <sup>19</sup> Ido' Zohane' ne'mine lo miningumu' Helodia' aza Zohanengumu' lukehe do mino bele helelesa gala giline'. <sup>20</sup> Ne'mine ine'za Zohane' aza ve lisihe' mino goloso nite' damaa' ine' monovo'vesi minine' nemu' gele mino ezemu' ehelele izavo Helode' aza gizebo lamine' o-dinako ne'mo nene Helodia' Zohane'ni ngelo belamiline' ine'. Helode' aza Zohane' gamazi nene gamene gamene gelo gala seta' gelaa' ine'za ha gelo lanite' gelaa' ine'.

<sup>21</sup> Alinge' Helodia' Zohane'ni beleline' aka ne'mino do soto' molani': Helode' soto' ine' gamene alitavo evene' naba guve'inesi ve ngamani gonolo' hize ele' i-daa' avesi amiliti evene' naba' naba nesi nGalilaia misubokoti' evene' naba' naba nesi elese molo ngemo noso' nite' naba gize vata' ine'. <sup>22</sup> Ne'mine igi ni nizavo Helodia' aluvo aza dizo evene' ve'nido' nene aza oga' ine' melengeni ogavo Helodekisi maka' minavesi ngumo helavo guve'inesi ve Helode' aza a'mine alu nemu' ti' lo line': Gaza inite' mamu' gelo liline' nene mo ha gemelesuve. <sup>23</sup> Ne'mine lo O'moso'mi velelo' noluve lo lo huko ti' lo lo-imine': Inite' ne'mine initekumu' gele nouve lo

lo-nemeline' nene ha gemelesuve. Ido' gizebo o nouvoni' misubo nene ho'lo seta' ogo lingela nemukisi liline' nene ha gemelesuve. <sup>24</sup> Lavo aza lemo izelehida ti' lo longo' ine': Nanitekumu' lolove. Lavo izeleho aza ti' lo line': Mono' noso holo-ngedaa' ive Zohane' godolo mamu' lozo. <sup>25</sup> Lavo lite' lo guvelesi ve neida dizo ti' lo line': Mono' noso holo-ngedaa' ive Zohane' godolo nene gito lapeseu' molo nemeline losa noluve. <sup>26</sup> Ne'mine lavo guvelesi ve nene geni biline'za evene' ve'nido' O'moso'mi velelo' lo hukine' nenako nemu' nene aza gamazi'ne lemalive lo gelo <sup>27</sup> lite' lo pilisi ve hamo' ma godolo gito do alive lo imiselavo vo galapuso numungu' luvono gito <sup>28</sup> godolo nene lapeseu' molo do ogo alungo nene emavo aza do izelehine imine'. <sup>29</sup> Ne'mine ogavo Zohane' izipahala zuho ingine gili igi oko'nola di vi geheni muliku' galese izi-dani' ve. Helode' aza Zohane'ni nene ne'mino bele helani' nenako Helode' aza Izesu' guvele nene gelosa a'mine bele hiluve Zohane' nene gohi ote noloseive lo gelosa ne'mine line' ve.

*Izesu' Evene' Faef Tauseni (5,000) Noso' Nite' nGemavo Nani'*

*(Mataio' 14:13-21; Luka' 9:10-17; Zohane' 6:1-14)*

<sup>30</sup> Izipahala zuhouti' ngimiselive aposolo ingine Izesuda tine' mili igi inite' ani' ido' mono' li-ngimani' nemu' nene vetete' igi li-imani'. <sup>31</sup> Ne'mine ikevo evene' muki' ingine engita igi vigi igi nizavo noso' nite' nalizani' gamenesi ivile' ogavo nemu' Izesu' ti' lo lo-ngimine': La'lisetevo' vo evene' nizamada haza guviselo' mine gelo

minelone. <sup>32</sup> Lavo sipiu' angise'inevo' dizi evene' nizamada haza guvisela vani'. <sup>33</sup> A'mida olihe nivavo evene' mukilite ningi engi' nizave li ningi tauni mukikuti' misubou' loti' izi vi gomu' hetelani'. <sup>34</sup> Vi hetelikevo Izesu' sipiuti' nolemo evene' vai' di gese' igi nizavo ningo ingine nene sipisipi izelo' gizebo oga' ive ma nomivo gopo monaa' nani' ne'mine igi minikevo engikumumu' muluno hukavo api' ogo inite' muki' apize ngemo minine'.

<sup>35</sup> Ne'mine ogo neivo ho' nene lemo vavo izipahala zuho ezela igi ti' li lani': Mene ebe' nene evene' nizamani' hadivelo' nonivo liti'muso gamene alitanaze. <sup>36</sup> Gaza evene' mene ngimise-lanivo vi avito' luhuvo numudasi hazalati-isi moni naliza noso' nite'ine meni hizilizaze. nGimiselezo. <sup>37</sup> Likevo Izesu' aza lo-ngimine': Lengi' nene noso' nite' di ngimilevo. Lavo ingine ti' li li-imani': Laza vo moni fo hadeti Kina (K400) ne'minedunu' beleti meni hizo mene aleve nalizave lo ngemekunivo ngelo vo dalihe. <sup>38</sup> Likevo aza ti' lo line': Linginela sikoni nanike' neve. Vi ningilo. Lavo vi ningi ti' li lani': Lezela sikoni faefusi (5) alaha' setakisi neive. <sup>39</sup> Likevo guvise lamineto' ve hizi hizi minilizave lo longemavo <sup>40</sup> ve hizi di duvaa' lomaa' ani' nene linge ma evene' hadeti (100) ne'mine minika' minika' ikevo linge ma nene evene' fifti (50) ne'mine minika' minika' ani' ve. <sup>41</sup> Ti' igi nizavo sikoni faef nesi (5) alaha' sita' nesi nene do Okulumota vonu' noogo O'moso opo'ni lo a'mine sikoni nene gito apilo izipahala zuho nete ize' mili evene' ngimilizave lo ngemo alaha' setakisi do gito ize' molo mukito' ngimine'. <sup>42</sup> nGemavo

evene' mukito' ni gatu'ine ani'. <sup>43</sup> Gatu'ine ogavo sikonisi alahakisi lumo hulani' nene gizeka' igi gosuvaha' tuvelu (12) ne'mine mili vai' lani' ve. <sup>44</sup> Noso' nite' nani' nene vemoho' faif tauseni ne'minelite nani' ve.

*Izesu' Aza Noso Avilelo' Lise Lise Vine'  
(Mataio' 14:22-23; Zohane' 6:15-21)*

<sup>45</sup> Ido' evene' nene noso' nite' ni osu' likevo Izesu' aza izipahala zuho nene sipiu' dizi noso hela hole Betesaida numuda gomu' nivilizave lo lite' lo ngimisele hulosa aza nene evene' muki' numu'nida ngimisele hulolosa ogo minine'. <sup>46</sup> Ne'mino mino geke'voke' lo hulo-ngedo aza O'mosola lolosa golola dizo vine'. <sup>47</sup> Ne'mine ogavo liti'muso izavo izipahala zuho vani' sipi nene noso oluso' minavo Izesu' aza asi'vevo' misubola haza mino <sup>48</sup> ningine' nene hepe' ne'mo vilizani' akalati' adi'mo izipahala zuho ingine sipi di vaa' ani' gavosodunu' nene sipi di vilisa ge'nebe goloso igi minani' nene ningine'. Nemu' nene go' lo'mo lomo nedenga' fo kiloku he faif kiloku he nela nene noso avilelo' lise lise vo nizada hetelo ngivile' ogo volosa ine'za <sup>49-50</sup> noso avilelo' lise lise novivo ingine mukito' ningi golise goloso gilisa holoso ve li gili geke' geke' lani'. Geke' lani'za a'mido' geto Izesu' gamazi lo-ngemo ti' lo lo-ngimine': Neni' ma ne nouze. lengehelele izamivo mini ngi li minilo. <sup>51-52</sup> Ne'mine lo sipiu' dizo nizada minine'. Dizos nominivo hepe' nene matine'. Matavo nemu' ingine gopo ga'ine goloso gilani'. Gopo ga'ine goloso gilani' nene Izesu' noso' nite' ngimine' gameneu' nene eze monovo ma ningadiniko



hepe' matine' nemu' nene gopo ga'ine goloso ma gilamadine'za ga'ine ngolo' lamivo eze monovo olihe ningami minani' nenako ne'mo nene gopo ga'ine goloso gilani' ve.

*Izesu' nGenesalete Misubouko Vo Inite' Gizi Dave Muki' Do Lamine' O-ngidine'*  
(Mataio' 14:34-36)

<sup>53</sup> Ne'mine igi noso helala vii nGenesalete misubouko heteli sipi nene noso gahevela na'nava iziki <sup>54</sup> sipiuti' limikevo evene' nete lite' li ei' ve li ningi gili <sup>55</sup> a'mine misubou' numuno mine'mo monida nene loti' izi vi inite' gizi dave holomolo' ingi minani' nene zalo' mili Izesu' neve li lani' ebeta ebeta nene ngele'mizi di vani'. <sup>56</sup> Ido' Izesu' taunila vihe luhuvo numuda vihe hazala vihe a'mida vida vida mini'mi monave nete inite' gizi dave nene ngele'mizi di igi maketi ebe'ine minida minida huli-ngidika' huli-ngidika' igi amuzo mili ti' li li-imani': Okongala inite' lolovolokovo' nevosi di gililizadotikisi nene lamine' ilizani' nenako nemu' nene gele ngemanivo di gililizave li lani'. Ido' oko'nolo' inite' lolovolo' di gilave muki' nene mo lamine' ani' ve.

## 7

*Zuda Ve O'moso'mi Gamazi Gili Huli Avo'ningeliti Gamazi Gili Dani' Monovo*  
(Mataio' 15:1-9)

<sup>1</sup> Halisaio' evene' masi Zelusalemi numudati' avo'ningeliti mono' gamazi apizi ngimaa' ave linge masi Izesuda vi di gese' ani'. <sup>2</sup> Ne'mine ikevo izipahala zuho linge nete a'ine di lamine' ami noso' nite' ninavo ningani'. A'ine di

lamine' amave lani' nene Halisaio' eveneliti monovo'nido' e'meti a'ine noso izamani' nemu' lani'. <sup>3</sup> Halisaio' evenekisi Zuda ve mukikisi nene avo'ningeliti monovo'nidokovo' gili di lute goloduvo elo minalive li a'ine di ato' igi noso izisavo' noso' nite' naa' nave. <sup>4</sup> Ido' noso' nite' maketiloti' meni hizi di igi ma noso izisavo' naa' nave. Ido' nevo' nomive. Avo'ningeliti monovo'ine ato ato' gohi masi masi neine' nene gili daa' nave. A'minguti' ma nene kapusi somosi ido' vapa lapesesi nene mono'inemu' gili nosou' iza' ani' ve. <sup>5</sup> Ido' Halisaio' evenekisi Zuda veti avo'ningeliti mono' gamazi apizi ngimaa' avesi Izesu'ni ti' li longo' i-di lani': Gei' izipaha zuho nene avotemotidati' do none' mono' gamazilo' e'metami mini a'mine gamazili'mo lido' igi a'ine noso' izami ha goloduvo ize minivo noso' nite' di naa' nani' nene nanimu' nave.\* <sup>6</sup> Ne'mine likevo Izesu' nene ti' lo lo-ngimine': Lengemeni dameni goloso di haleki evene' lamine' gili monaa' nave lengikumu' Isaia' line' ma nene lamine' laani' neive. Aza ti' lo gize neive:

Me aleve nete ve'ine avileloti' neni' gulive'ne di

hozi li minaa' nani'za

lu'ine nene nezela milamavo lu'ine've nene hoto'

minaa' neive.

<sup>7</sup> Haza eveneliti gamazi nene neze gamazi gidini

lolo' ogavo

li-ngimi ngimi' igi minaa' nani' nenako

ne'mo nenikumu' nopo'ni laa' nani' nene gopo

hazamu' laa' nave.

---

\* **7:5:** A'nido' goloduvo ize minivo ve lune' nene haza goloduvo mamu' lamune. Asi Zuda vete gilavo lute do goloso oga' inite' ve li gilani' initekumu' lune' ve.

8 Lingine O'moso'mo lou' gamazi lo hukolingidine' ma nene huli eveneliti monovo'ine nene di gili' li minaa' nave.

9 Ne'mine losa ti' lo lo-ngimine': Lengi' nene avotingidati' monovo do minelone li O'moso'mi lou' gamazi izi hulato' nene otohato ve gehepeve minikeve. 10 Ne'mine noluvoni' mene lingine ti' iga' angumu' noluve: Mose' aza ma ti' lo lave: Lingine izetingine metinginemu' gilavo dizavo gelekele' lamine' i-ngidivo' minilo. Ido' ma nene ve mali'mo izelehingi melehingi gamazi goloso lo-ngedeline' nene mo bilikevo hehelive. 11 Ne'mine lo line'za lingine a'mine line' gamazilo' e'metilizani' aka nene ti' igi hizi tilaa' nave: Evene' malite engi' ize'ninginemu' nehe me'ninginemu' nehe ti' li li ngimaa' nave: Lengi' hize ele' o-lengedo lengemelone' o minine' inite' nene kolobani inite' lolo' ogani' nenako ma lengemamolosune. Ido' Kolobani inite' lolo' ogave lani' ne'mi monovo nene ne'mino neive: O'moso'mine molo-dekunivo mo ei' inite've lolo' ogave. 12 Ido' ne'mine lani' ne'mo nene alinge' ize'ningine me'ningine hizi ele' ilisa ikevo ma lingine o've li-ngidikevo ize'ningine me'ningine gelekele' lamine' i-ngidivo' minilo lo Mose' line' gamazilo' e'metilizani' aka nene hize tilaa' neive. 13 Ne'mine ogavo lingine lengi' monovotine nene O'moso'mi gamazilo' di medeli apizi ngimaa' nani' ne'mo nene O'moso'mi gamazi do haza nite' lolo' o-daa' neive. Ido' nevo' nene nomive. Linginela ne'mine monovo nene muki' minaa' neive.

*Lute Do Goloso O-daa' Initeliti Monovo  
(Mataio' 15:10-20)*

<sup>14</sup> Ne'mine lo Izesu' evene' muki' gohi asi lo-ngemo ti' lo lo-ngimine': Naza gamazi lo-lengemekuvo mukito' gili gili ngolo' lilo. <sup>15-16</sup> Inite' naanivo mulungauko lemaa' neine' inite' ne'mo nene luka do goloso o-damoloseive. Lukati' dizaa' neine' ne'mo nene luka do goloso o-daa' neive.

<sup>17</sup> Ti' lo lo-ngemo evene' hulo-ngedo numungu' dizavo izipahala zuho nete aneza gamazimu' longo' i-dani'. <sup>18-19</sup> Longo' i-dikevo ti' lo lo-ngimine': Haza aleve ani' ne'mini linginesi olihe gili guni amahe. Inite' ma naline' ne'mo nene lukau' vo holamo gatungau' lemo ise galeseu' vaa' neinako luka ngelo do goloso amoloseive. Nemu' nene gili lamine' amahe. Ne'mine line' nene noso' nite' muki' nete lute di goloso amilisanako ha nalosune losa line' ve. <sup>20</sup> Ne'mine lo gohi mesi line' ve: Lutinguti' dizaa' neine' inite' ne'movo' nene lutine do goloso o-lengedaa' neive. <sup>21</sup> Naza ne'mine noluvoni' nene lutinguti' goloso nite' ne'minosa dizaa' neingumu' luvoni' ve: Ado' gatine goloso gilaa' ido' umungive alungo gopo ingi monaa' ido' gumine damine oga' ido' evene' ngebele helaa' <sup>22</sup> ido' vene' vemoho' lili' ikeni' nene gopo ingi monaa' ido' initekumu' lumo helepele' oga' ido' monovo do goloso oga' ido' go'ine izo gosoho' nasaha' laa' ido' zogo zogo peleseve' iza' ido' ve maliti initekumu' mumuzo' ogo lukehe ngebelaa' ido' evene' dovo ledevo' ogo ngemenga laa' ido' hokolize' igi okodine di dizaa' ido' dingani hizo

minaa' <sup>23</sup> ne'mine inite' goloso muki' ne'mo nene lutinguti' dizaa' neine' nenako ne'mo nene lutine do goloso oga' neive line'.

*Hoinikia Ebetoti' Vene' Mali'mo Izesu'ni Gele Imine'*

*(Mataio' 15:21-28)*

<sup>24</sup> Ne'mine ogo aza a'mine ebe' hulo oto Tilo misubou' ebe' nabala vine'. Vo numuno mau' dizo evene' hamolitesi mela nouvongumu' nene gilikelizave lo giline'za aza ngelo halekiline' amine'. <sup>25</sup> Ne'mine neivo vene' mali'mi aluvo ne'mi lulou' nene sikalahu' golosoli'mo dizo minavo vene' ne'mo Izesu' guvele nene gelo lite' lo ogo gizeneu' gubi' ize imine'. <sup>26</sup> A'mine vene' nene Zuda vene' nevoba Silia misubo'mi gahavela Hoinikia alevetinguti' soto' ogo mino nGiliki aleveti monovo'nido' e'meto minine' vene' ne'mo nene ei' aluvo'mi lulouti' sikalahu' goloso nene imisele hulilive lo amuzo molo lo-imine'.

<sup>27</sup> Lo-emavo Izesu' aza aneza gamazi ma ti' lo lo-imine': Izipeliti noso' nite' nene ipe' ogo gulo ngemaa' nene edamive. O'moso'mi izipahala Isilaele' aleve do lamine' o-ngedaa' nouvoni' nenako gei' heta ato' vene' do lamine' o-gedeloni' nene edamoloseive losa gele nouve. Nemu' nene noso' nite' nene a'mine izipe nete gana' nalisave.

<sup>28</sup> Ti' lo lavo a'mine veneli'mo Izesu' gamazi'velo' do velepe' izo ti' lo lo-imine': Guvekasi ve gaza lamine' laine'za izipelite noso' nite' nanguti' lana ngomo tevoliloti' do'mozine' nene a'mine tevoli'mi sebengu' minaa' ani' gulo nete ha naa' nave. Nemu' nene ha gele nemelesane. <sup>29</sup> Lavo Izesu' lo-imine': Ti' lo laningumu' nene gele

gemekuve. Numungala vozo. Sikalahu' goloso nene mo aluva hulo-do vave. <sup>30</sup> Lavo numu'vela vo ningine' nene sikalahu' goloso aza hulo-do vavo izipe nene holomolo' ongo neivo ningine'.

*Gala Molavo Gamazi Lo Lamine' Amaa' Ive Ma Izesu' Do Lamine' O-dine'*

<sup>31</sup> Ne'mine ogavo Tilo ebekuti' tine' molo vo Sidoni ebe' hulo vo Dekapoli misubo ivile' ogo nGalilaia noso ohuda vo heteline'. <sup>32</sup> Vo hetelavo gala molave gamazi lo guno amive nene ele'mizi Izesuda igi anadunu' oko'nolo' do geleliho li agae li li-imani'. <sup>33</sup> Li-imikevo vo evene' nizamunguko ele'mize molo ana nedunu' gala lulou' molo gituho' ogo vele nahunolo' do giline'. <sup>34</sup> Do gelo Okulumota vonu' ogo le' izo ti' lo lo-imine': Ehata, leli' gamaziuti' nene ngolo' lozo losa ve. <sup>35</sup> Lavo geto gala ngolo' lavo vele nahuno nene do velepe' izavo gamazi nene lo lamine' ine'. <sup>36</sup> Ne'mine ogavo evene' mukikumu' nene a'mine gamazi nene li soto' amilizave lo lo hukongidine'za li soto' ikevo aza gohi o've lo-ngedeka' lo-ngedeka' neivo ingine di naba ika' ika' igi li soto' ika' ika' i'mi vi minani'. <sup>37</sup> Ido' ingine amuzo mili siza li mini ti' li lani': Aza inite' muki' o'mo vine' nene mo laminekovo' o'mo vave. Aza lavo ga'ine molave ingine gamazi gohi nigilavo gamazi lamilizado' i minave netesi nene gamazi ha nilave.

## 8

*Izesu' Evene' Fo Tauseni (4000) Noso' Nite' nGemavo Nani' Gamazi (Mataio' 15:32-39)*

<sup>1</sup> A'mine gameneu' nene evene' muki' gohi igi di gese' igi noso' nite' nomivo nizavo Izesu' aza izipahala zuho asi lo-ngemo ti' lo line':  
<sup>2</sup> Mene aleve nene nazasi gamene sitohamo maka' minunidi'mo noso' nite'inesu' nomivo engikumu' mulu'ne hukave. <sup>3</sup> Noso' nite' namavo numu'nida ngimiseleloni' nene akala vilizada ve'ine ga'ine monavo di'mozilisave. Linge ma nene aka hotati' nizave. <sup>4</sup> Lavo izipahala zuho ingine di velepe' izi ti' li li-imani': Ebe' hadi-velo' mene evene' muki' mene noso' nite' nadi' ogo ngemelone. Noso' nite' dalone' akate nene ma nomive. <sup>5</sup> Likevo aza longo' o-ngedo line': Linginela sikoni nanike' neve. Longo' ogavo seveni ve lani'. <sup>6</sup> Ingene likevo evene' muki' misubolo' minilizave lo lo-ngedo sikoni seveni nene do O'moso opo'ni lo apilo ize' mili evene' ngimilizave lo izipahala zuho ngemavo ingine ize' mili evene' muki' ngimani'. <sup>7</sup> Alaha' ngomo ngomo ngomosi' minine' nesi nene do o'mosola lo a'minesi evene' ngimilizave line'. <sup>8</sup> Ne'mine ogavo ni gatu'ine ani'. Ne'mine igisa lumo hulani' nene gizeka' igi gosuvahaku' milikevo gosuvaha' seveni vai' line'. <sup>9</sup> Noso' nite' nave nene fo tauseni (4,000) ne'mine minani'. <sup>10</sup> Ido' evene' nene ngimisele hulo aza nene izipahala zuhosi geti sipiu' dizi Dalamanutu misubouko vani'.

*Halisaio' Evene' Nete Izesu' Ato' Nite' Ma Do Soto' Ogavo Ningelone Lani' Gamazi*  
*(Mataio' 16:1-4)*

<sup>11</sup> Vi nizavo Halisaio' evene' ingine igi ezesi gamazi gono di mini ei' nene nimiselive O'moso

aza nenikisi neive line' nene lamine' lihe gosoho' lihe nemu' O'moso'mo amuzo emavo atoli'mine suno do soto' ogavo ningelone li emengu' mili lani'. <sup>12</sup> Ne'mine ikevo lulouko agae lo gelo ti' lo line': Lamineto' O'moso'mi amuzo gezela neingumu' nene gele ele'vole' oloningisi atoli'mine suno do soto' oganivo ningelone li idise mene gamenelo' nizave lingine laa' nani' nene nanimu' laa' nave. Naza mo lamineto' lo-lengemeloze. Idise gamenelo' nizani' aleve mene atoli'mine suno ne'mine nene mo keke' lengelebizamolosuve. <sup>13</sup> Ne'mine lo hulo-ngedo sipiu' dizo noso ohuno helala volosa aka api' ogo vine'.

*Halisaio' Aleve Ido' Helode' Ve Engi' Monovo'nido' Nene Izipahala Zuholite E'metikelizave Lo Izesu' Aneza Gamazi Longimine' Gamazi*

*(Mataio' 16:5-12)*

<sup>14</sup> Ido' izipahala zuho nene beletimu' ga'ine molavo ma di vamavo beleti inginela ma minamidine'za hamokovo' nene sipiu' ma minine'. <sup>15</sup> Ne'mini nivavo Izesu' aza evene' maliti nge-meni dameni golosomu' beleti do lulu iza' ine' inite' zisitilo' nene aneza gamazi lo molo ti' lo hungo' molo lo-ngimine': Halisaio' mono' laa' avelatikisi ido' Helodedatikisi zisiti nene dike-lizave. Nemu' ningisa minilo. <sup>16</sup> Ne'mine lo longemavo ingine li volelo' melo' igi ti' li lani': Laza beleti ma do amune' nenako nemu' lave. <sup>17</sup> Likevo gelo Izesu' aza ti' lo lo-ngimine': Beleti di amani' nemu' nene nanimu' li volelo' melo' nave. Lingine olihe gili lamine' amahe. Lutine'mi gala nene ngolo' lamihe. <sup>18-19</sup> Vetine



neine'za ningamahe. Gatine neine'za gilamahe. Gomu' nene evene' faef tauseni (5,000) engikumu' sikoni faef do gito apilo ngemekuvo nikevo lingine sikoni lumosama nedunu' nene gosuvaha' nanike' go'zi vai' lani' neve. Nee mamu' gatine molahe. Ne'mine lavo ingine ti' li lani': Gosuvaha' tuvelu (12) ve <sup>20</sup> likevo gohi ti' lo line': Ido' evene' fo tauseni (4,000) engikumu' sikoni seveni gito apilo ngemekuvo nikevo lingine sikoni lumosama hulani' nene gosuvaha' naba' naba nanike' go'zi vai' lani' neve. Lavo ingine gosuvaha' naba' naba seveni ve lani'. <sup>21</sup> Ne'mine likevo aza ti' lo lo-ngidine': Ido' lingine a'mine nemu' mo gili minani'za monovo'vemu' nene olihe gili lamine' ami naza beletimu' lokuvosa nilahe.

*Izesu' Betesaida Numuda Vo Vele Likive Ma Do Lamine' O-dine' Gamazi*

<sup>22</sup> Neloti' nene vi Betesaida numuda hetelani'. Hetelikevo a'mida nene ve ma vele likive Izesuda ele'mizi igi oko'nolo' do geelive li muheleka li longo' i-dani'. <sup>23</sup> Longo' i-dikevo aza vele likive'mi analo' do numuno ebe' heta vo veleu' gituho' ogo holo-do ana hitosa ti' lo longo' o-dine': Inite' noningabe. <sup>24</sup> Longo' o-davo aza vokene' ogo ningo ti' lo line': Evene' za gili vani' nene nimonavo noninguve. <sup>25</sup> Lavo Izesu' aza ana velelo' gohi hitavo ve aza vele do guno ningavo vele nene lamine' ogavo inite' muki' ningo ninge ngolo' line'. <sup>26</sup> Vele lamine' ogavo numu'vela imiselo ti' lo lo-dine': Luhuvo numuda nene vamo gei' numungala vo minezo.

*Izesu' Nene O'moso'mo Do Lu' Izelive Lo Imiselelesa Live Ve Lo Petolo' Lo Soto Ine' Gamazi (Mataio' 16:13-20; Luka' 9:18-21)*

<sup>27</sup> Ido' neloti' nene Izesu' aza izipahala zuhosi Kaesalea Hilipi ebeta luhuvo numuno mineka' mineka' ido' vani'. Akalo' olihe nivi Izesu' aza izipahala zuho ti' lo longo' o-ngidine': Evene' ingine nene nezemu' zaho ve li laa' nave. <sup>28</sup> Longo' o-ngedavo ingine ti' li li-imani': Evene' ma nete nene mono' noso holo-ngedaa' ive Zohane' nene hilinguti' otosa noloseive li laa' nave. Ido' linge ma nete nene gozopo' polohete Elia' aza gohi soto' oloseive lave ma nene tine' molo abe li laa' nave. Ido' linge ma nete nene gomu' minani' polohete hilani' linge engitati' otanive nolibe li laa' nave. <sup>29</sup> Ne'mine likevo Izesu' aza gohi ti' lo longo' o-ngidine': Ido' ingine nene mo ne'mine laa' nani'za lingine nenikumu' nene zaho neve li laa' nave. Ne'mine lavo Petolo' aza ti' lo line': Gaza nene O'moso'mo do lu' izeline lo gimiselelesa lo huko-gidive ma nene nane. <sup>30</sup> Ne'mine lavo ingine evene' masi masi a'mine monovo'vemu' li-ngimikelizave lo lo huko-ngidine' ve.

*Izesu' Aza Bili Hililizani' Gamazi Lo-ngemosa Ve Ma Eze E'meti Nivi Mulumo Gono Gihilizangu' Olovo' Ilizado' I Minave Nene Minevo' Minevo' nGemeni Ma Damilisave Line' (Mataio' 16:21-28; Luka' 9:22-27)*

<sup>31</sup> Ne'mine ogo Izesu' aza api' ogo gamazi ti' lo apize ngeme'mo vine': Neni' gono ne'mo gihile've do soto' ilingumu' O'mosolati' ve gihile neni' nene mulumo gono naba gehu helosa gohi otelodo' o neine' nenako mono' gizebo

vesi eveneto' medeli mini O'moso inite' lehizi daa' ave nabasi ido' Zuda vete gozopotati' laa' ani' mono' apizi ngimaa' ave nesi ingine mehe'ine nimi mulumo nite' muki' nimii nibili hilikevo helosa gamene seto hamo mino otelesuve. <sup>32</sup> Ne'mine lo a'mine gamazi nene lo lamino lo soto' ogoza lo ngolo' lo lo-ngimine'. Ne'mine lo lo-ngemavo Petolo' aza ele'mize gahevela ogo heleline' gamazi lingumu' nene elemelesa ine'za <sup>33</sup> Izesu' mine velepe' izo izipahala zuho vonu' ngebelo Petolo'ni elemo ti' lo line': Gaza gaka gele naine' nene O'moso'mo gilidi'mino gelamo asi me misubou' vete gilaa' adi'mino gele nange. Satani gaza aka'ne hize tilamo olovo' ozo.

<sup>34</sup> Ti' lo evene' mukikisi izipahala zuhosi asi lo-ngedavo ezela igi di gese' ikevo ti' lo lo-ngimine': Ve ma ingine neni' ne'meto alone li gili ma gomu' nene engi' minevo' alevone gizebo iga' nani' monovo'ine nene huli alami neni' ne'metilizangumu' ve goloso nizave li lohoto' zalo' ngibili hililizangumu' nene gili hulisa ne'meti alizave. <sup>35</sup> Ido' ne'mine igisa ne'meti alizave lo noluvoni' nene nanitekumu' luhe. Lingine mene gililo: Ve ma ingine neni' ne'metelone' nene geni initeli'mi lulou' vo minevo' alevote hulalone li ne'metamilizave nene minevo' minevo' minaa' ngemeni dameni nene ma damilisave. Damilisaha ve ma ingine neni' gamazi'ne lamine' nene gili gili ele'vole' igi ne'metilizangumu' ngibili hilikevo minevo' alevone hulilizani' nene alinge' minevo' minevo' minaa' ngemeni dameni nene ha dalisave. <sup>36-37</sup> Ee, evene' ma ingine minevo'

minevo' minaa' ngemeni dameni ma hulilizani' nene a'mine ngemeni dameni gohi do engita olone li a'mido' golo hizilizani' inite' nene hamokisi ma minamoloseive. Nemu' nene evene' ma ingine misubouko mene minevo' alevo' igi mini misubou' inite' vai' nene di engita igi minilizangu' nene minevo' minevo' minaa' ngemeni'ine hulilizani' nene a'mine inite' vai' nete nene ma hize ele' i-ngidamilisave. <sup>38</sup> Ido' me misubou' minevo' alevo'inemu' gili neni' ne'metamilizave nene ingine minevo' minevo' minaa' ngemeni dameni nene ma damilisave noluvoni' nene ve ma ingine libilikevo minevo' alevote hulalone li a'mine O'moso huli lihime daa' akalo' vaa' nani' aleve engi' vovo'ningu' nene neni' gamazi'ne hize ele' oga' unive neni' evenele none lilisa ngovozi hililizani' nene O'mosolati' ve gihile naza me'nehi amuzo do ti' ogo ei' angelo' vesi alone' gamenela a'mine alevemu' nene neni' evene'ne nizave lolosa ingine adi'mino novozo helo lamuvo minevo' minevo' minaa' ngemeni dameni nene ma damilisave.

## 9

<sup>1</sup> Ne'mine lo imine' molo ti' lo lo-ngimine': Lamine' ma lo-lengemeloze. Melo' nizave lengikuti' linge ma nene hilami ha nizavo O'moso'mo gizebo o-ledaa' monovo nene amuzo'vesi soto' ogavo ningilisave.

*Izesu' Oko'nolo Do Atoli'mine Ine' Gamazi  
(Mataio' 17:1-13; Luka' 9:28-36)*

<sup>2</sup> Ido' gamene sigisi ogo vavo Izesu' aza Petolo'ni ve Zakobo'ni ve Zohane'ni ve nene golo ha'nalo' ngele'mizo dizavo a'mida engikovo' mini ningi nizavo ei' oko'no do atoli'mine ogavo <sup>3</sup> genegana've nene silingenge'ni've hulo mokono' goloso elo minine'. A'mine mokono' iline' ne'mine nene me misubouko evene' hamoli'mosi ngelo ma do soto' amoloseive. <sup>4</sup> Ne'mine neivo Eliaki Moseki soto' igi Izesulesi gamazi li volelo' melo' igi nizavo ningani'. <sup>5</sup> Ne'mine igi nizavo Petolo' aza Izesu'ni ti' lo lo-imine': Tisazo, maka' melo' minune' nene lamine' ogave. Nemu' nene azibe sitoamo ma gizelone. Ma nene gei' ve ido' ma nene Mose'ni ve ido' ma nene Elia'ni ve. <sup>6</sup> Golise naba gili minani' nenako nemu' Petolo' aza nadive lolove lo gamazi gopo line'. <sup>7</sup> Lavo limusoli'mo ogo molo hite-ngedavo limuso lulouti' O'moso'mi nolo ma ti' lo soto' ine': Me ve nene neni' gipe'ne lu'ne eme nouvoni' nenaze. Eze gamazi've gili dalo. <sup>8</sup> Ti' lavo a'mido' lite' li velepe' izi ningani' nene ve masi minamani'za Izesukovo' neivo ningani'.

<sup>9</sup> Ne'mine igi gololoti' limi ada nene Izesu' ti' lo lo huko lo-ngimine': Inite' ningani' nene vetete' igi li-ngimami nizavo O'mosolati' ve gihile naza helo otekuvo ma nene ha li-ngimilizave. <sup>10</sup> Lavo line' gamazi gili di li soto' ami mini hilinguti' ote'line' gamazi line' nemu' nene monovo vise' igi li volelo' melo' igi minani'. <sup>11</sup> Ido' ti' li longo' i-dani': Do lu' izelive lo O'moso'mo do kegeso imiselelesa live nene a'mine gozopo' minine' polohete Elia' ne'mo gomu' molo-do tine' molo aloseive li avotemoti mono' gamazi apizi limaa'

avete laa' nani' ma nene nanimu' laa' nave.  
<sup>12</sup> Ne'mine li longo' i-dikevo aza ti' lo lo-ngimine':  
 Inite' muki' do veveselesa Elia' gomu' aloseive  
 lani' nene mo lamineto' lani' ve. Ne'mine ani'za  
 ve gihile neni' nene mulumo nite' nimi gob-  
 oni mili-nidilisave li polohetelite nenikumu' ma  
 nene nadive li gizi nizani' neve. <sup>13</sup> Ne'mine  
 lo mono' noso holo-ngedaa' ive Zohane' nene  
 Eliado' medelo minine' nemu' gililizave lo gelo ti'  
 lo lo-ngimine': Ido' Eliangumu' lo-lengemeloze.  
 Polohetelite ezemu' luhuvo gizi milani' nene mo  
 gihile izave. Aza mo gomu' molo-nedo ogavo ve  
 lingelite engi' lu'nido' e'meti bilani' ma ve.

*Izesu' Aza Sikalahu' Goloso Lulou' Minine'  
 Gipe Ma Do Lamine' O-dine'*

*(Mataio' 17:14-21; Luka' 9:37-43a)*

<sup>14</sup> Ne'mine igi izipahala zuho linge nizada vi  
 hetelani' nene evene' mukilite di vodo vodo i-  
 ngidi nizavo avo'ningeliti mono' gamazi apizi  
 ngimaa' ave linge ma nete lolize gani li-ngimi li  
 volelo' melo' igi nizavo ningani'. <sup>15</sup> Niningavo  
 evene' muki' eze ningi upuho' goloso igi geti ezela  
 loti' izi vi geke' voke' li-dani'. <sup>16</sup> Ne'mine ikevo  
 Izesu' ti' lo longo' o-ngedo line': Nanitekumu'  
 lolize gani li volelo' melo' nave. <sup>17</sup> Longo'  
 ogavo evene' mukikuti' ve mali'mo ti' lo lo-  
 imine': Tisazo, gipe'ne'mi lulou' nene sikalahu'  
 golosoli'mo mino gamazi liline' aka hize tile-  
 davo geita ele'mizo nouvoni' ve. <sup>18</sup> Sikalahu'  
 golosoli'mo do ote-dine' gamenelo' gamenelo'  
 nene do hulo misubolo' o-do izo gesebe' ize-  
 davo veleti' gituho' galakala' dizo veleti' kiliko'  
 kiliko' lo mino gizene ana do ngipu ngapa lo

minaa' neive. Ne'mine ogo minaa' ingumu' izipaha zuho nete sikalahu' goloso nene imisele hulilizave lo ingine nizada ele'mizo uvoni'za ingine nene ngeli imiseli hulilizado' minamani' ve. <sup>19</sup> Ne'mine lavo Izesu' ti' lo lo-ngimine': Eii, ngeli imiseli hulisa'mani' nehe. Lingine O'mosomu' gili ele'vole' amani' zuho lengikumumu' nene gosele' nebele'mo novivo lengi' vovotingu' gamene gohi ma imine' molo mino langamuzo hize'mo vo mineloni' nemu' agae lo noluve. Gipe nene neni' nouvoda ele'mizi alo. <sup>20</sup> Lavo ele'mizi ikevo sikalahu' goloso ne'mo Izesu'ni ningo gipe nene ehuso' ogo hulavo misubola lemo pou' lo ongo velepe' velepe' izo minavo veleti' gituho' galakala' vo minine'. <sup>21</sup> Ne'mino neivo Izesu' aza gipe ne'mi melehine longo' o-do line': Inite' nanihekuti' gize dani' neve. Lavo aza line': Izipe ngomoloti' gize dani' ve. <sup>22</sup> Gamene muki' izipe nene belelesa oloku' nehe nosou' nehe ehuso' ogo hulaa' ine' ve. Nemu' nene do lamine' o-ledelinido' o neivo ma nene muhelete ningo do lamine' o-ledezo. <sup>23</sup> Lavo Izesu' ti' lo lo-imine': Do lamine' o-delinido' o neivo ma ve laine' ma nene naza ma lokuvo gelezo. Gele ele'vole' o minelive ne'mo nene amaa' nitekisi ha oloseive. <sup>24</sup> Lavo izipeli'mi meleho geto geke' naba lo line': Idise geikumumu' gele ele'vole' o nouve. A'mine gele ele'vole' o nouvoni' ne'mo vo damida nene hize ele' o-nedezo. <sup>25</sup> Lavo evene' muki' ingine loti' izi igi di gese' navo ningo sikalahu' goloso elemo ti' lo line': Sikalahu' goloso gaza gipe me'mi gala do negi hize-do gamazi laa' aka've hize tile-danive gaza ei' lulouti' lemo vosa tibizo amozo lo nolo huko-giduve. <sup>26</sup> Lavo geke' lo do gabe' kabe'

o-dosa lemo vine'. Lemo vavo gipe aza hilave ne'mino ongo miningumu' evene' linge muki' nete nene aza mo helave lani'. <sup>27</sup> Lani'za Izesu' aza analo' dosa do hozi lo-davo otine'.

<sup>28</sup> Ne'mine ogavo Izesu' aza numungu' dizavo izipahala zuhosi angisevo' mini ti' li longo' i-dani': Sikalahu' goloso nene laza naniteli'mo imisele hulamolono' ine' neve. <sup>29</sup> Ne'mine li longo' i-dikevo ti' lo lo-ngimine': Inite' atotunu' nene sikalahu' goloso ne'mine nene ngelo ngimiselamolosune. Asi O'mosola laadunukovo' nene ngimisele hulolosune.

*Izesu' Helo Galeseuti' Oteline' Gamazi Nene Gohi Lo Soto' O-ngimine'*

*(Mataio' 17:22-23; Luka' 9:43b-45)*

<sup>30-31</sup> A'mine ebe' huli nGalilaia misubou' vi heteli a'mine misubo nene ivile' iki elese' igi vani'. Ido' elese' igi vani' nene Izesu' aza izipahala zuho gamazi apize ngeme'mo vo minine' nenako nemu' evene' nete aza mela neive li gilikelizave lo lavo elese' igi vani'. Ne'mine igi nivado' nene izipahala zuho ti' lo apize ngeme ngeme' o'mo vine': O'mosolati' ve gihile neni' nene evene' maliti a'ningu' nele'mizi milikevo di vi nibili hililisave. Di vi nibili hiliikevo helo mino gamene setohamo vavo otelesuve. <sup>32</sup> Ne'mine lo line'za izipahala zuho ingine a'mine gamazi'mi monovomu' nene gili lamine' amani'. Gili lamine' amani'za eikumumu' golise gili nemu' longo' i-damani' ve.

*Evene' Naba Lolo' Oga' Monovomu' Izesu' Lo-ngimine'*

*(Mataio' 18:1-5; Luka' 9:46-48)*



<sup>33</sup> Ido' Kahanaumi numudo' vi heteli numungu' dizisa Izesu' aza izipahala zuho longo' o-ngedo ti' lo line': Akala ma nene lingine nanitekumu' li volelo' melo' i'mi ave. <sup>34</sup> Longo' o-ngedavo ingine akalo' niigi engi' mukikuti' nene ve zaho ngivile' ogo naba neive li li volelo' melo' ani' nenako nemu' gamazi li-imami minani'. <sup>35</sup> Gamazi li-imamavo aza mito' mino izipahala zuho tuvelu asi lavo ezela ikevo ti' lo lo-ngimine': Ve ma ingine evene' naba minelone li ma evene' muki' nene dizi minikevo engi' nene limi mini evene' mukiliti gelekele' ve minilisave. <sup>36</sup> Ne'mine lo izipe ngomo ma ele'mizo vovo'ningu' do ote-do do mumunouko o-de mino ti' lo lo-ngimine': <sup>37</sup> Ve ma ingine nenikumu' ve li izipe ngomo me'mine ma ngele'mize lamine' ilizani' nene neni' nele'mize lamine' ani' geleleseive. Ido' neni' nele'mize lamine' ilizani' nene nenikovo' nele'mize lamine' ami nimiselive nesi nene ele'mize lamine' ani' geleleseive.

*Ve Ma Biluva' I-lidamilizave Nene Lelita Ve Ne Nizave Lo Izesu' Line' Gamazi  
(Luka' 9:49-50)*

<sup>38</sup> Ido' Zohane' aza ti' lo lo-imine': Tisazo, ve mali'mo gei' guliveka lo soto' ogo gei' vekamu' ve lo sikalahu' goloso nongimiselivo laza ningo a'mine ve nene lezesi bizo gei' ge'metesa'mine' nenako nemu' ne'mine amozo lo o've lo-dekune. <sup>39</sup> Lavo Izesu' aza ti' lo line': O've li-damilo. Ve ma ingine neze gulive'ne li soto' igi neze ve'nemu' ve li amuzo nite' di soto' ilizave nete ingine lite' li divi' ledivi' ma i-nidamilisave. <sup>40</sup> Ve ma ingine biluva' i-lidamilizave nene lelita ve

nene nizave. <sup>41</sup> Naza lamine! Ma lo-lengemelove. Ve ma aza nene lingine neni! Kilisito! zuho nizangumu! ve lo noso kapuu! ohizo lengemeline! ne'mi meni've nene damilivoba daloseive.

*Izesu' Aza Lihime Dalizadi'mo Goloso Ikelizave  
Lo Hungo' Gamazi Line'  
(Mataio' 18:6-9; Luka' 17:1-2)*

<sup>42</sup> Ido' nenikumu' gili ele'vole' igi minaa' nani' izipaha'ne zuho limi minani' engikuti' hamo' ma evene' mali'mo goloso nite' daline' akau' ele'mize molalosa neivo ma a'mine ve nene O'moso'mo mulumo gono naba' naba emalinako nemu' nene goloso nite' daline' akau' nene olihe ele'mize molamivo gomu' nene luvonou' genivesi geheni naba nene nalava izi-di noso ohuno nabau' ehuso' i hulikevo a'mingu' lemo heleine' nene lamine' oloseive. <sup>43-44</sup> Ido' anga sita' ha do mino O'moso'mo lihime gemavo lihizami oloku' viline' nene mo edamoloseine' nenako nemu' nene anga mali'mo lihime daa' akalo' gele'mize molalosa neivo ma o've lo a'mine anga nene huko hulaine' gilivosa minezo. Anga hamokovo' minine' gilivo mino minevo' minevo' ebekuko viline' nene ede voloseive. <sup>45-46</sup> Ido' gizenga sita' ha do minanivo O'moso'mo lihime gemo olo' galeseu' gehuso' o huliline' nene mo edamoloseine' nenako nemu' nene gizenga mali'mo lihime daa' akalo' gele'mize molalosa neivo ma o've lo a'mine gizenga nene huko hulaine' gilivosa minezo. Gizenga hamokovo' minine' gilivo mino minevo' minevo' ebekuko viline' nene ede voloseive. <sup>47-48</sup> Ido' veka sitakisi

ha nanivo O'moso'mo lihime gemo oko'nine naliza ginine osu' lamavo olo' lihizamiline' galeseu' gehuso' o huliline' nene edamoloseine' nenako nemu' nene veka gulo mali'mo lihime daa' akalo' gele'mize molalosa neivo ma gaza o've lo a'mine veka nene kuluhize hulaine' gilivosa minezo. Veka hamokovo' minine' gilivo mino O'moso'mo gizebo o neingu' viline' nene ede voloseive.

<sup>49</sup> Noso' niteku' lanite' ilive lo guvo hulaa' none. A'mine'mine ogo evene' mukito' olo' ne'mo guvo ne'mine lolo' oloseive. <sup>50</sup> Guvo nene lamine' neine'za guvo lanite've ma osu' lavo ma gohi nado do lanite' o-delone. Noso' niteku' guvo hulokunivo lanite' oga' neine' ne'mino lingine lutingu' guvo ne'minosa lanite' o minivo mini a'mida a'mida hongu li minilo.

## 10

*Izesu' Vene' Huli-ngidaa' Nemu' Lo-ngimine' Gamazi*

*(Mataio' 19:1-12; Luka' 16:18)*

<sup>1</sup> Izesu' aza a'mine ebe' hulo Zudaia misubo nene vo hulo Zodani noso helala vine'. Vo nela neivo ezela evene' muki' ihe' igi di gese' ikevo aza oga' ine' ne'mino gohi mono' apize ngemo minine'.

<sup>2</sup> Ne'mino neivo Halisaio' mono' laa' ave malite igi emengu' mili ti' li longo' i-dani': Ve mali'mo elenahine imisele huliline' nene gaza gelanivo leze Zuda veti lou' gamazi avuto' ilihe amilive.

<sup>3</sup> Longo' i-dikevo velepe' izo longo' o-ngedo ti' lo line': Mose' aza nadive lo lo huko-lengede neine' neve. <sup>4</sup> Ne'mine lavo ingine ti' li lani': Ve ma

elenahine imiselelove lo gelo ma vene' vemoho' izi hukaa' luhuvo gizo emosa imiseleleseive lo Mose' aza gele leme neine' ve. <sup>5</sup> Likevo aza ti' lo line': Lngine gamazi gilami peleseve' izaa' angumu' a'mine lou' gamazi nene gize-lingidine' ma neive. <sup>6</sup> Gize-lingidine'za O'moso'mo inite' mata' gana' api' ogo do soto' ine' gamenela nene vene' vemoho' do soto' ine' ve. <sup>7</sup> Nemu' ti' lo lo neine' ma neive:

Vemoho' nene izelehingi melehingi hulo elenahida bizo minavo ingine hamo' lili' asine' gelavo minilisasive.

<sup>8</sup> Nemu' nene ingine sita' nizasive ma longedamolosune. Mo hamo' nene nizasive.

<sup>9</sup> Nemu' nene O'moso'mo inite' do hamo' ogo molo neinguti' ve malike do ize' molaa' nene nomive. <sup>10</sup> Ne'mine lavosa numungu' dizi minangu' nene izipahala zuho nete a'mine initekumu' nene gohi longo' i-dani'. <sup>11</sup> Longo' i-dikevo ti' lo lo-ngimine': Ve mali'mo elenahine imisele hulo vene' gohi ma daline' nene aza elenahine do gopo o-do O'moso'mi lou' gamazi avuto' oloseinako lihime naba daloseive. <sup>12</sup> Ido' vene' ma vanahine hulo-do ve gohi malo' viline' nene O'moso'mi lou' gamazi avuto' oloseinako lihime naba daloseive.

*Izesu' Izipe nGomo No'noho' Ize-ngidine'  
Gamazi*

*(Mataio' 19:13-15; Luka' 18:15-17)*

<sup>13</sup> Evene' malite izipe ngomo nene oko'nido' do gelo no'noho' ize-ngedelive li Izesuda ngele'mizi nivavo izipahala zuho nete o've li-ngidi ngelemani'. <sup>14</sup> Ne'mine ikevo ningo gelo Izesu'

aza izebolo' molavo ti' lo lo-ngidine': Iziphe ngomo ngomo me'mine minave nene O'moso'mo gizebo o neingu' ngele'mize molaa' neinako huli-ngimikavo nenita ha alizaze. O've li-ngidamilo. <sup>15</sup> Naza lamineto' nolo-lingimuve: Iziphe ngomoliti ngemeni dameni ne'minesi mini O'moso nene gizebo vete minelive li gelekele' lapa nomine' i-damilizave nene ei' O'moso'mo gizebo o neingu' nene mo keke' vi hilamilisave. <sup>16</sup> Ne'mine lo izipe ngabuti' izo ana oko'nido' nohito no'noho' ize-ngidine'.

*Izesu' Heneni Vemu' Line' Gamazi  
(Mataio' 19:16-30; Luka' 18:18-30)*

<sup>17</sup> Izesu' aza aka volosa api' neivo ve mali'mo loti' izo ogo hetelo gizeneu' gubil' ize emo longo' odo ti' lo line': Tisa' lamino, naza nene nadi' okuvo O'moso'mo minevo' minevo' nemeni dameni nemelive. <sup>18</sup> Lavo Izesu' ti' lo lo-imine': Nezemu' nene ve lamino nanimu' nolo-nedane. Lamine' minave nene hamokisi mo nizamavo O'moso ei' hamo' nene lamine' minive nenako ne'mine laine' nene neni' monovo'ne nadi' o neive. <sup>19</sup> Gaza aka gamazi nene mo gele nane. A'mine gamazi nene ti' lo neive: Lingine evene' ngibili hilamilo. Ido' vene' vemoho' lili' ikeni' nete lingine bizivo' mini vene' nehe vemoho' nehe gohi masi gopo ingamilo. Ido' gumine amilo. Ido' evene' mamu' gopo' napa gamazi li-ngidii sakupo gamazi li-ngidamilo. Ve maliti inite' nene tiliki igi damilo. Ido' izetingine metinginemu' gilikevo dizavo gelekele' i-ngidi minilo. <sup>20</sup> Ne'mine lo-emavo ve aza ti' lo lo-imine': Tisazo. A'mine laine' muki' nene naza izipeloti' gelo e'mete'mo ogo minuvoni' ve. <sup>21</sup> Lavo Izesu' aza ningo

ninge lamine' o-do ti' lo lo-imine': Gaza inite' hamo' ma amanidi'mo nene lisihe' amane. Vo inite' mataka muki' nene ize' molo meni do a'midoti' moni nene do goho' gahali' ize' molo ngemezo. Ne'mine iline' ne'mo nene henenika Okulumokuko nene ma mineleseive Ne'mine ogosa ogo ne'metezo. <sup>22</sup> Ne'mine lo lavo ve aza ei' henenive vai' lo minine' nemu' agae lo geni belavo muhele' ogo vo ha ha ine' ve.

<sup>23</sup> Novivo Izesu' aza velepe' izo vonu' ngebelo hulo eza ema ogo izipahala zuho ti' lo longimine': Heneni nganeni ve ingine O'moso'mo gizebo o neingu' nene vi hilalisa ge'nebe goloso ilisave. <sup>24</sup> Lavo izipahala zuho ingine Izesu' gamazi ne'mine lingumu' gopo ga'ine gilani'za gohi ti' lo lo-ngimine': Vekizo. O'moso'mo gizebo o neingu' vo holaa' nene ge'nebe gono goloso neive. <sup>25</sup> Ido' kamela ize nene naba neine' nenako nemu' nene nala' loloso' iga' nani' nakese ne'mi veleu' nene ma volosa iline' nene ge'nebe goloso oloseine'za heneni ve nete a'mine nene ivile' ivosa O'moso'mo gizebo o neine' ebeku' nene vilisa ge'nebe ilisave. <sup>26</sup> Ne'mine lavo ingine upuhu' goloso igi vo'ine vavo angise'ine ti' li li volelo' melo' ani': Laza nene O'moso'mo umo hilive nene heneni ve lolo' o-ngedaa' neihe lo gilune'za gaza heneni ve netesi O'moso'mo gizebo o neine' ebeku' nene mo vi hila'ilisave lo lainako nemu' nene O'moso'mo evene' hamokisi mo ma do lu' izamivo eze gizebo ingu' nene vo holamolobe lo nogilune. <sup>27</sup> Ne'mine likevo Izesu' aza vonu' nongebelo ti' lo lo-ngimine': Evene' angise'nidati' lukuvo ngeli ma namilisaha O'moso nene engi' ne'mine nomive. O'ove. Ei'

nene inite' muki' oga' amuzo do neine' nenako  
 evene' do ngu' izelido' lisihe' o neive.

<sup>28</sup> Lavo Petolo' api' ogo ti' lo lo-imine': Gaza  
 gelezo. Laza neve inite' matate muki' nene hulo  
 osu' lo ge'meto noune. <sup>29</sup> Lavo Izesu' ti' lo line':  
 Lamineto' ma lo-lengemelove. Ve ma ingine  
 nenikumu' ido' mono' gamazi laminekumu'  
 numuno ebel'ine nehe uvo'ningine naku'ningine  
 nehe ate'ningine aluno'ningine nehe ize'ningine  
 me'ningine nehe ido' izipaha'ine nehe  
 misubo'ine nehe ne'mine inite' ma huli nilizani'  
 nene <sup>30</sup> a'mine huli nilizani' initeto' nene medeli  
 ma damilizavoba mo dalizavevo' nene nizave.  
 A'mine huli nilizani' inite' muki' hamoto'  
 hamoto' nene hadeti hadeti ne'mine gohi ma  
 dika' dika' ilisave. A'mine numu'nido' nehe  
 engi' zuholo' nehe minamuno'nido' nehe a'mido'  
 a'mido' nene gohi gohi dalisave. A'mine inite'  
 nene idise none' gameneu' nene dika' dika'  
 ilisani'za goboni mala' mala' ne'mi lulou' nesi  
 mini-di vilisave. Ido' alinge' gamene ma soto' ogo  
 alingu' nene minevo' minevo' ngemeni dameni  
 nesi dalisave. <sup>31</sup> Ne'mine ilisani'za dizi nilizani'  
 aleveuti' linge muki' nene limi minilisave. Ido'  
 limi nilizani' aleve nene dizi minilisave.

*Izesu' Helo Galeseuti' Oteline' Gamazi Nene  
 Gohi Lo-ngimivo Gamene Setohamo Ine'*

*(Mataio' 20:17-19; Luka' 18:31-34)*

<sup>32</sup> Zelusalemi numuda vilisa akalo' nivavo  
 Izesu' aza gomu' molo novivo izipahala zuho  
 ingine nene ngehelele ize mine' mine' ivo ni-  
 vavo ma nge'meti vave ingine nene golise gi-  
 lani'. Ti' navo Izesu' aza izipahala zuho tuvelu  
 nene ngele'mize gaheve ogo ezela soto' o-deline'

initekumu' nene gohi api' ogo ti' lo lo-ngimine':  
<sup>33</sup> Gililo. Laza nene Zelusalemi numuno ebeta  
 dizo novune. A'mida nene O'mosolati' ve gihile  
 neni' nene eveneto' medeli mini O'moso inite'  
 lehizi-daa' ave nabasi avotemote lani' mono'  
 apizi ngimaa' avesi engi' a'ningu' milikevo ingine  
 goni' i-nidi lihimeka apaso helelinido' o neive li  
 Zuda ve minamani' heta ato' aleveliti a'ningu'  
 mili-nidikevo <sup>34</sup> ingine gize zohi' i-nidi gituho'  
 i-nidi gasavasi nalatunu' nene mehe'ne izivi'  
 ledivi' igi nibili nibili hililisave. Ne'mine igi nibili  
 hilikevo gamene setohamo vavo gohi otelesuve lo  
 line'.

*Zakoboki Zohaneki Evene' Naba Guvetesi Ve  
 Lolo' Olosive Li Izesu'ni Longo' I-dasine'  
 (Mataio' 20:20-28)*

<sup>35</sup> Zebedaio' gipele seta' Zakoboki Zohaneki  
 ingi Izesuda vi ti' li li-imasine': Tisazo. Laza  
 inite' nanitekumu' lolosihe a'minemu' lokusivo  
 gaza a'mido' o-ledeline losa nolusive. <sup>36</sup> Likesivo  
 aza ti' lo longo' o-ngidine': Lingi nene naza  
 nadi' o-lengedelongumu' nilasive. <sup>37</sup> Lavo ti' li  
 li-imasine': Gaza Guvekasi ve lolo' ogo mine-  
 line' gamenela nene laza gezeloti' lemo evene'  
 lingesi ma ngivile' ogo guvetesi ve lolo' ogo  
 mino anga zamelasi adavalasi minilizo lo gele  
 lemeline losa nolusive. <sup>38</sup> Likesivo aza ti' lo  
 lo-ngimine': Lingine longo' i-nidasine' initeli'mi  
 monovo nene gilami gopo likesive. Inite'  
 goloso i-nidilizani' nene ekese' noso ne'mino ne-  
 nako a'mine i-nidilizani' inite' nene ha gehelesa  
 nouve. Ido' linginesi neni' geheloni' inite' ekese'



noso ne'mine minine' nene ha gihilisido' i niza-sihe. Mulumo alumo nite' noso ne'mino holosa ne'mi lulou' minelongu' nene linginesi ne'mi lulou' nene ha minilisido' i nizasihe. <sup>39</sup> Lavo ingine ti' li li-imasine': Ee, laza ne'mine ha olosido' o nosive. Likesivo Izesu' aza ti' lo lo-ngimine': Lamine' lingine neni' geheloni' geni nene gihi mulumo alumoli'mi lulou' minelongu' nene linginesi a'mine'mi lulou' nene minilisine'za <sup>40</sup> a'ne zamelasi adavalasi minaa' mo'mosi' nene neni' inite' neivosa lengemelohe. O'moso'mo dalisive lo do va'va' o-ngidive engikovo' nene dalisasive.

<sup>41</sup> Zakoboki Zohaneki ne'mine asine' nemu' izipahala zuho linge teni ingine gili engikumumu' nene mulu'ningu' goloso ine' <sup>42</sup> Ne'mine ogavo Izesu' asi lo-ngedavo ezela ikevo ti' lo lo-ngimine': O'moso'mi zuho minamani' heta ato' ve engi' gizebo ve'ine ve lave ingine nete evene'ine nene gelekele' i-lidilizave li amuzo mili li-ngidaa' nave. A'mine evene' engita evene' naba minave nete nene a'mine evene'ine zuho nene ngivile' igi amuzo ve goloso minisa gizebo i-ngidaa' nave. Ne'mine iga' nani' nemu' nene lingine mo gili nizani'za <sup>43</sup> lengi' muliseu' nene ingine iga' nani' ne'mine nene ma amilisave. Lengikuti' ve mali'mo guve'nesi ve lolo' olove lo gelo ma aza nene lengi' gelekele' vetine ne'mine lolo' ogo mineleseive. <sup>44</sup> Ee, ve ma aza gomumu' molo lengemo evene' naba minelove lo gelo ma aza nene mukiliti goboni izipe ne'mine lolo' ogo mineleseive. <sup>45</sup> Ido' ne'mine noluvoni' nene naza O'mosolati' ve gihile nouvoni' nesi nene evene' gelekele' i-nidi nele'mize lamine' ilizave losa lemmu've. Asi gelekele' o-ngedo ngele'mize

lamine' olosa ogo evene' muki' nene meni hizo do ngu' izo do tine' molo-ngedelove lo engikumumu' oko'ne hulo hehelesa limuvoni' nenako nemu' noluve.

*Izesu' Aza Vele Likive Batimaio'ni Do Lamine' O-dine' Gamazi*  
(Mataio' 20:29-34; Luka' 18:35-43)

<sup>46</sup> Zeliko numuda vi hetelani'. Vi heteli A'mine ebe' nene huli izipahala zuhosi evene' muki' ezela di gese' igi minavesi nivavo Timaio' gipele Batimaio' aza vele likavo mino monimu' voku' voku' lo aka gahevela minine'. <sup>47</sup> Mino Nasalete ve Izesu' nave likevo gelo api' ogo amuzo molo asi lo line': Izesuvo, guvelesi ve naba Davidi' a'vo ezelo' medelo minanive make, nenikumumu' nene mulumo'ne ningevo. <sup>48</sup> Lavo evene' muki' ingine legeno minelive li o've li-di elemani'za aza nene gohi amuzo molo vise naba lo ti' lo line': Davidi' a'vo make, nenikumumu' nene mulumo'ne ningevo. <sup>49</sup> Ne'mine lo'mo lo'mo angumu' nene gelo Izesu' aza akalo' vo ote mino alize li-imilo line'. Lavo vele likivemu' nene asi ti' li li-imani': Gezemu' nolize. Mulungau' lamine' gelo oto ano. <sup>50</sup> Ne'mine likevo vele likive gelo saketi've apase hulo upuhu' ogo oto Izesuda vine'. <sup>51</sup> Vogavo Izesu' aza ti' lo longo' o-do line': Gaza nene nadi' o-gedelove losa nogelane. Ne'mine lo longo' o-davo aza ti' lo line': Guve'nesi ve make, gaza ve'ne nene do lamine' oganivo gohi ve'ne ningeloho. <sup>52</sup> Ne'mine lavo Izesu' aza ti' lo lo-imine': Gaza gele ele'vole' anidi'mo nene lamine' ogange. Vozo. Ne'mine nolivo a'mido' lite' lo

vele nene lamine' ogavo vele ningo akalo' nene Izesu'ni e'meto vine'.

## 11

*Izesu' Aza Zelusalemi Numungu' Dizo Volosa Navo Evene' Nete Ganine Hizi nGolize Izi Ele'mizi Dizi Vani'*

*(Mataio' 21:1-11; Luka' 19:28-40; Zohane' 12:12-19)*

<sup>1</sup> Zelusalemi numuno di avito' igi Oliva golola ebe' seta' Betehagesi Betanisi minasida nene vi hetelani'. Vi hetelisa Izesu' aza izipahala zuhoutu' seta' ma ngimiselo <sup>2</sup> ti' lo lo-ngidine': A'mine ningi nizasine' numuno ebeku' volene vi nidi' dizi ningilisine' nene dongi ize evenelite a'mido' mito' mini olihe monamani' nene nalava izi nizavo ningilisasize. A'mine nene vakesi daalizo. <sup>3</sup> Ne'mine nasivo ye mali'mo nanitekumu' nasive lo nolivo ma lingine ti' li li-imilizo: Guvelesi ve aza gono've ma neivo a'mine dongi izemu' mene lavo nousinako gono davo lite' lo gohi do ti'no imiseleleseive li lilizo. <sup>4</sup> Lavo vi numuno gatedo' aka gahevela na'nava izikani' dongi ize angale naba nene ningi vakesasine'. <sup>5</sup> Ne'mine igi nizasivo a'mido' minave nete longo' i-ngidi ti' li lani': Ize nene nanitekumu' nivakesasive. <sup>6</sup> Likevo Izesu' lo-ngimine' gamazi ma nene li-ngimikesivo ha huli-ngimikavo vasine'. <sup>7</sup> Huli-ngimikavo vi a'mine dongi ize nene Izesuda di ikesivo saketi'ine nene apasi ize ne'mi mehenelo' mi-likevo Izesu' aza a'mido' dizo minine'. <sup>8</sup> Ne'mine ogavo Evene' linge muki' nete nene saketi'ine apasi akalo' avilise' i'mi nivavo linge ma nete nene za a'nava avilesi guviseti' huki di ani' nene

avilise' i'mi vani'. <sup>9</sup> Ne'mine i'mi nivavo gomu' milavesi alinge' milavesi ingine geke' geke' li ti' li lani': Geikumu' nene gopo'ni nolunize. Guvetesi ve o'moso'mi velemu' anive gei' nene O'moso'mo no'noho' ize-gidivo. <sup>10</sup> Avoteho Davidi' mo'mosi've do geita ogo guvetesi ve lolo' ogo gizebo o-ledo mineline' gamene nene alitaze. A'mine gizebo iline' nene O'moso'mo no'noho' izelive. Agae, veleta Okulumoku' O'moso gei' nene gopo'ni nolune.

<sup>11</sup> Ne'mine i'mi navo Izesu' aza Zelusalemi numuno ebeku' dizosa mono' numuno nabau' dizo inite' mata' mono ninge osu' line'. Ne'mine ine' nene nivenga' mo molangu' nenako azasi izipahala zuho tuvelu nesi nene Betani numuda limi vani'.

*Gohuno Za Ma Izesu' Usi' Ize-dine' Gamazi  
(Mataio' 21:18-19)*

<sup>12</sup> Liti'muso izo go' lavo Betani numudati' nil-imi Izesu' ga'na olavo <sup>13</sup> gohuno za avile mukikisi hoto' neivo ningo a'mido' gihile ize neihe lo vise' olosa vine'. Vo ningo gihile izaa' gamene amine' nenako gihile izamivo avilevo' ningine'. <sup>14</sup> Ningo a'mine zamu' ti' lo line': Geito' nene gihile gohi ma izamivo ve mali'mosi elo namilive. Ne'mine line' nene izipahala zuho nete gilani' ve.

*Izesu' Aza Mono' Numuno Nabau' Maketi Mialaa' Meni Hizaa' Igi Minave Nene nGimiselo Do Huline'*

*(Mataio' 21:12-17; Luka' 19:45-48; Zohane' 2:13-22)*

<sup>15</sup> Ido' Zelusalemi numuda gohi vi hetelani'. A'mida Izesu' aza mono' numuno nabau' vo

dizo inite' maketi milaa' meni hizaa' igi minave nene ngeleto do hulo mono' numungu' hulaa' moni senisimi iga' aveliti holomo'ine nene do tululu lo do hulo-ngedo nama viluso O'moso lehizi-dilizangumu' meni hizilizave li maketi mili minavete minaa' holomo'inesi nene do velepe' izo hite-ngidine'. <sup>16</sup> Ido' mono' numuno nabau' nene maketi inite' nevo'mine nene di dizi limi amilizave lo o've lo-ngidine'. <sup>17</sup> Ne'mine lo-ngedo evene' apize ngemo ti' lo line': O'moso'mo ti' lo line' gamazi ma nene luhuvo gizamani' nehe:

Neni' numu'ne nene  
 evene' ato ato' zuho muki' nete dizi nopo'ni li-nimaa' numuno ve losa mineleseive.

Ne'mine li gizani'za lingine a'mingu' igi mili minaa' nani' inite' ne'mo nene guminelo' vete igi mili minaa' numuno lolo' ogave.

<sup>18</sup> Ne'mine lavo eveneto' medeli mini O'moso inite' lehizi-daa' ave nabasi mono' apizi ngimaa' avesi ingine gili bililizani' aka vise' i'mi vi minani'. Ido' bililizani' akamu' vise' ani' nene nanitekumu' ve. Evene' muki' nete eze apize ngemo minine' gamazi nemu' nene lanite' gili golize lani' nenako nemu' ingine golise gili bililizani' akamu' nene vise' i'mi vi minani' ve.

<sup>19</sup> Ido' mo nivenga' molavo izipahala zuhosi Zelusalemi numuno ebe' nene huli vani' ve.

*Gele Ele'vole' O Mino O'mosola Lakumu' Izesu' Line' Gamazi*

*(Mataio' 21:20-22)*

<sup>20</sup> Ingi go' lavo nedenga' akalo' gohi nivi gohuno za nene monovoukoti' gulugulu ize piline' nene ningani'. <sup>21</sup> Petolo' aza a'mine za ningidoti' Izesu' gamazi line' ma nene galau'

ogavo gohi gelo ti' lo lo-imine': Tisazo, ningezo. Gei' usi' ize-daine' gohuno za nene mo gulugulu izave. <sup>22</sup> Lavo Izesu' do velepe' izo ti' lo lo-ngimine': Lngine nene O'mosomu' gili ele'vole' igisa minilo. Naza lamineto' ma lo-lengemelove. <sup>23</sup> Ve mali'mo gala seta' gelamo loloni' gamazi nene gihile izeleseive lo gele ele'vole' o mino mene golomu' ngutoko guvo nosou' lemelive lo lo-deline' nene lilido' gihile ha izeleseive. <sup>24</sup> Nemu' nolo-lingimuve. Inite' ne'mine mana'mine initekumu' O'mosola li longo' igi nili mo dalosune li gili ele'vole' ilizani' nene lilizado' ha gihile izeleseive. <sup>25-26</sup> Ido' gamene gamene oti mini O'moso opo'ni nilii ma ve mamu' lihime di minilizani' nene ha hulingidilo. Ne'mine ikevo Okulumoku' metibo aza a'mine'mine ogo lengi' lihimetine nene ha hulolengedeleseive.

*Izesu' Ogo Molo Oga' Ine' Amuzo'vemu' Longo' I-dani' Gamazi*  
(Mataio' 21:23-27; Luka' 20:1-8)

<sup>27</sup> Ido' Zelusalemi numuda gohi dizi ikevo Izesu' aza mono' numuno nabau' dizo nomonivo eveneto' medeli mini O'moso inite' lehizi-daa' ave nabasi mono' apizi ngimaa' avesi mono' gizebo vesi ezela igi <sup>28</sup> longo' i-di ti' li lani': Inite' oga' naine' nene zahi velemu' oga' nane. Ido' zaho lavosa oga' nane. <sup>29</sup> Longo' i-dikevo aza ti' lo lo-ngimine': Nazasi inite' mamu' longo' o-lengedekuvo li-nimilizani' nene naza zahi velemu' inite' oga' nouhe nemu' nene lo-lengemelesuve. <sup>30</sup> Mono' noso holo-ngedelive lo Zohane'ni imiselive ma nene O'moso'mo

imiselihe haza misubou' velite imiselave. Lingine a'minemu' likevo gelelove. <sup>31</sup> Ne'mine lavo ingine angise'inemu' li volelo' melo' igi ti' li lani': Laza O'moso'mo imiselive loso' nene Izesu' aza lingine ti' li ma eito' nene nanimu' gili ele'vole' amave lo lalive. <sup>32</sup> Ne neiha haza misubou' velite imiselave ha lolobe. Ne'mine lani' nene evene' muki' nete Zohane' nene polohete gihile minine' ve li gilani' nenako eveneliti golise'ine gili lani' ve. <sup>33</sup> Nemu' nene Izesu' longo' ine' gamazilo' nene ti' li li-imani': Laza ma gelamune. Likevo Izesu' aza ti' lo lo-ngimine': Lingine linimamani' nemu' nene nazasi ogo molo oga' nouvoni' inite' nene iline lo nimiselivemu' nene ma lo-lengamamosuve.

## 12

*O'moso'mo Ei' Evenele Zuho Zuda Velo' Gizebo Ve Nete Gelekele' I-damavo Nene Do Hulo-ngedeleseive Lo Vaini Mido' Gizebo Velo' Lo Molo Aneza Gamazi Line'.*

*(Mataio' 21:33-46; Luka' 20:9-19)*

<sup>1</sup> Ido' aneza gamazi ma Izesu' ti' lo lo-ngimine': Ve mali'mo vaini mine zuho' ogo a'mido' gesi hize vodo vodo ogo vaini gihile hite mi' izo lipeline' galese nesi elosa a'mingu' mini mi'velo' gizebo iliza numuno ha'na nesi do dizo gizo evene' ma mine gizebo i-dilizave lo hulo-ngedo misubo mala vo minine'. <sup>2</sup> A'mida neivo vaini nala' gihile elaa' gamene ogavo mine meleho aza a'mine vaini nala' gihile nene ma do-nedo alive lo gelekele' izipe ma mine gizebo vela imiseline'. <sup>3</sup> Imiselavo vo hetelavo mine gizebo ve ingine analo' di gili' liki bili imiseli hulikevo initekisi

ma damo haza tine' molo vine' ve. <sup>4</sup> Ne'mine ogavo gelekele' izipe gohi ma engita imiselavo vo hetelavo godolo izi okoti huli di goloso inite' gehepeve i-dani'. <sup>5</sup> Ne'mine i-dikevo gohi ma imiseline' nene bili hilani'. A'mine'mine igi gohi evene' muki' ngimiseline' nene linge ma ngibili di goloso i-ngidi linge ma nene mo ngibili hilani' ve. <sup>6</sup> Ne'mine ikevo imiselelive hamo' ma minine' nene lulo eme neine' gipele minine' nenako alinge' noimiselo ti' lo line': Aza neni' gipe'ne nenako ha ele'mize lamine' ilisave. <sup>7</sup> Ti' lo imiseline'za vo hetelavo mine gizebo ve nete ti' li li volelo' melo' igi ti' li lani': Me ve'mo alinge' melehido' medelo mino mine dalive nenaze. Alo' bele hiluke'zo. <sup>8</sup> Ne'mine okunivo mine mene leli' mide lolo' ilive. Ti' li lite' li analo' diki bili hilisa minguti' gelelehe' igi di vi heta huli-dani' ve.

<sup>9</sup> Ne'mine ani' nenako mine meleho aza nadi' ilive. Aza nene ogo a'mine mido' gizebo ve muki' nene ngebele gese' ogo mi'velo' nene evene' ato' gohi gizebo ve ma hulo-ngedeleseive. <sup>10</sup> Ido' mono' godolou' gamazi ma ti' lo neine' ma nene lingine gati gilisa'mahe:

Numuno gizilizani' geheni mukikuti' geheni ma nene  
 numuno gizza' avete ningi goloso o vive lii  
 di kegesi di hulani' geheni ne'mo nene  
 geheni muki' ngivile' ogoa numuno do amuzo  
 molo minaa' geheni lolo' ogave.

<sup>11</sup> A'mine inite' do soto' ive nene guvelesi ve'mo do soto' ine' ve.

A'mine inite' nene evenelite ningune'  
 mo amebe izo do soto' ogani' neive.



<sup>12</sup> Ti' lo lo-ngemavo a'mine Zuda veliti mono' ve naba ingine aneza gamazi nene lelikumu' lave li gili galapuso emelone li gilani'za evene' muki' a'mida minavemu' nene golise ngemavo huli-di vani'.

*Izesu'ni Ganala Daline' Akalo' Ele'mizi Milalisa Takisi Monimu' Emengu' Mili Longo' I-dani' Nene nGivile' Ine' Gamazi*

*(Mataio' 22:15-22; Luka' 20:20-26)*

<sup>13</sup> Ne'mine igi Zuda veti gizebo ve ingine Hali-saio' mono' laa' aveutikisi guvelesi ve Helode'ni hize ele' i-daa' aveutikisi linge ma ingine vi Izesu'ni golo izikevo goni' o-delone' gamazi lilihe li ngimiselikeyo <sup>14</sup> ezela igi heteli ti' li li-imani': Tisazo, gaza ve lisihe' lamine' naine' nene mo gele none. Gamazi lo-ngemeline' aleve nene nani'mine aleve nilizahe nemu' gaza gaka muki' gelesa'mane. Evene' naba mini gei' liline' gamazimu' mulu'ningu' goloso gili gelemilizadokisi nilizani' nemu' gelamo O'moso'mi aka lelebizo gamazi gihilevo' lo-lemaa' nane. Nemu' nene gaza laanivo geelone. Loma veti guve'inesi ve naba Kaesale' aza takisi moni huli-nidilizave lo neido' nene e'meto Zuda ve laza ma hulo-deso' nene lisihe' o neihe lou' gamazite avuto' o neive. <sup>15</sup> Gaza gelanivo takisi emelonido' o neihe emamolonido' o neive. Ne'mine lani'za lingine Kaesale'ni takisi imilo liline' nene Zuda ve ngizebolo' molavo ganala dalive. Ido' imamilo liline' nene Loma ve ngizebolo' molavo ganala dalive li gili longo' ani' initeli'mi monovo gililisa lami ha ve'ine avileloti' golo izisa longo' i-dani' nene Izesu' aza mo ningo gelo ti' lo lo-

ngimine': Nanimu' nemengu' nimilave. Moni ma di igi nelebizikevo ningelove. <sup>16</sup> Lavo ma imikevo ningo ti' lo longo' o-ngedo line': Me monilo' eveneli'mi golo velesi gulivesi neine' nene zahi golo velesi gulivesi neive. Longo' o-ngedavo ingine Kaesale' ma ve lani'. <sup>17</sup> Likevo Izesu' ti' lo lo-ngimine': Ti' li ma a'mine moni nene ngamani gizebo ve ei' Kaisale' inite've nolo-seinako a'minemu' nolivo ma nene ha imilo. Ido' a'mine'mine igi O'moso'mo lingimine' initeto' nene ha golo hizi imilo. Ne'mine lavo ingine golize naba li-dani'.

*Izesu'ni Di'mi Limi-dilisa Helakuti' Otaa' Monovomu' Longo' I-dani' Nene nGivile' Ine'*

*(Mataio' 22:23-33; Luka' 20:27-40)*

<sup>18</sup> Ido' Sadukaio' mono' laa' ave helakuti' otaa' ne nomive laa' ave engikuti' linge ma Izesuda igi longo' i-di ti' li lani': <sup>19</sup> Tisazo, Mose' aza luhuvo gize-lidine' nene ti' lo neive: Uvo'ninge naku'ninge ma minilizanguti' mali'mo vene' do mino izipe gedamo helavo ma engikuti' mali'mo a'mine gevono' vene' nene dosa a'mine hilive nemu' medelo izipe gedo molo-delive. <sup>20</sup> Ne'mino nenako uvo'ninge naku'ninge seveni ma minani'. A'minguti' uvo'nibo gana've ne'mo vene' do mino izipahala soto' amavo hiline'. <sup>21</sup> Helavo akunolo a'midoti' ne'mo a'mine vene' nene do mino izipe soto' amivo hiline'. Ido' helavo akunolo a'midoti' ne'mo a'mine vene' dani'za izipe gedamo hiline'. <sup>22</sup> Ne'mine igi a'mine vene' dika' dika' igi izipe gidami ve seveni ingine mukito' hilika' hilika' igi osu' lani'. Ne'mine ikevo alinge' a'mine venekisi nene hiline'. <sup>23</sup> Ne'mine

ogavo a'mine vene' nene a'mine ve seveni muki' nete dani' nenako evene' muki' hilanguti' otiliza gameneu' nene zahi elenaho lolo' ilive. <sup>24</sup> Likevo aza ti' lo lo-ngimine': Lingine gili gopo ani' nene O'moso'mi gamazi mono' godolou' gizi nizani' ma nene gili vevesami O'moso'mi amuzomukisi ma gili lamine' isa'mani' nenako nemu' nene gili gopo ani' ve. Olo. <sup>25</sup> Ne'mine noluvoni' nene nemu' noluve. Helaakuti' otaa' gameneu' nene vene' daa' ido' velo' vaa' monovo nene ma minamoloseive. Asi O'moso'mi angelo've ha minaa' nani' ne'mini evene' inginesi ha minilisave. <sup>26</sup> Ido' lingine helaakuti' otaa' nemu' likeze. A'minemu' ma Lo-lengemelove. Mose' aza zauti' olo' gulumo ogavo ninge neivo O'moso'mo gamazi ti' lo lo-imine' mono' godolou' gize neine' ma nene gati gilaha gilamave: Naza nene Abalahamule Isakale Zakobole engi' O'moso'ine nouve line'. <sup>27</sup> Ido' a'mine ve hili osu' ladiniko engi' O'moso'ine nouve ngelo ma lamidine. Engi' O'moso'ine nouve line' ne'mo mo hili osu' lami ha nizave lo gelelesune. Nemu' nene lingine hilave nene mudise osu' laa' nave laa' nani' nene mo ladanga gehepeve nilave lo lo-ngidine'.

*Lou' Gamazi Mukikuti' Nene Nani Gamazi'mo Dizosa Neive Lo Ve Mali'mo Izesu'ni Longo' O-dine' Gamazi*

*(Mataio' 22:34-40; Luka' 10:25-28)*

<sup>28</sup> Ne'mine li gamazidunu' ge hulo ne hulo li gamazi gono di nizavo mono' apize ngemaa' ive mali'mo ogo gele minine' nene Izesu'ni longo' i-dikevo a'mido' nene do lamine' ogo do velepe' izo nolo-ngimivo gelo ti' lo longo' o-do line':

O'moso'mo lou' gamazi lo huko-lidine' neuti' nene gamazi muki' ngivile' ogo nani gamazi'mo dizosa neive. <sup>29</sup> Lavo Izesu' ti' lo lo-imine': Dizo neine' gamazi nene ne'mine lo neive: Lingine Isilaele' aleve gililo. Guvelesi ve O'mosote neve nene ei' hamo' Guvelesi ve ne neive. <sup>30</sup> Nemu' nene lutine gatine vodinesi amuzotone vai' nesi nene Guvelesi ve O'mosotida nene mili osu' li lutine imivo' minilo. <sup>31</sup> Ido' a'midoti' lemo nene ti' lo neive: Lingine lengi' okodinemu' gilaa' nani' ne'mine igi evene' avita gidini nizavemukisi nene gili lutine ngimilo. A'mine gamazi seta' ngivile' ogo minine' lou' gamazi nene gohi ma nomive. <sup>32</sup> Lavo mono' apize ngemaa' ive aza ti' lo lo-imine': Tisazo, mo lamine' gehepeve lane. O'moso nene hamo' neivo O'moso gohi ma nomive lo laine' nene mo lamine' lane. <sup>33</sup> Ido' lute gatesi amuzote vaikisi nene mudise ezela molo mino lute emo minaa' ido' leli' okodemu' gelaa' nune' ne'minosa evenekumu' gelo lute ngemaa' ne'mo nene inite' oloku' gizo O'moso lehize-daa' ido' ato ato' nite' lehize-daa' monovo nene ivile' goloso ogosa naba neive. Mo lamine' lane. <sup>34</sup> Ne'mine lavo aza gele vevese mino ne'mine line' nene gelo Izesu' aza ti' lo lo-imine': O'moso'mo gizebo o neingu' vo holalinido' avito' ogane. Ne'mine lavo gili ngehelele izavo evene' hamolitesi inite' mamu' gohi longo' i-damani'.

*Do Lu' Izelve Lo O'moso'mo Imiselelesa Live Guvelesi Ve Davidi' A'vo Ne'mo Nene Davidi'ni Ivile' O-dosa Neive Lo Izesu' Lo-ngimine' Gamazi (Mataio' 22:41-46; Luka' 20:41-44)*

<sup>35</sup> Izesu' aza mono' numuno nabau' mono' noapize ngemo ti' lo longo' o-ngidine': Mono'

apizi lingimaa' ave nete O'moso'mo do lu' ize-  
live lo imiselelesa live nene mo ha Davidi'  
a'vopilemo' neive laa' nani' nene nanimu' laa'  
nave. <sup>36</sup> O'moso'mi Sikalahuli'mo do ote-davo  
asi've Davidi' ne'mo nene ti' lo line' ma neive:  
Okulumuku' ve aza Guve'nesi vemu' ti' lo lo-  
imine' ve:

Nezeloti' gei' nene nange. A'ne hulaa' uvoda  
mene minezo.

Nanivo biluva' i-gidaa' nave nene gizengala  
do'mo leme-ngedekuvo gelekele' i-gidi  
minilisave.

<sup>37</sup> Ne'mino asi've Davidi' ne'mo nene a'mine  
do lu' izelive lo O'moso'mo imiselelesa livemu'  
Guve'nesi ve ve lo line' nenako nemu' nene  
a'mine ve aza ha Davidi' a'vovo' nene nado mine-  
live. Olo. Ne'mine lo mono' nolivo di gese' ave  
muki' ingine lanite' gili minisa gapepe' i minani'.

*Mono' Apizi nGimaa' Aveliti Monovo Golo-  
somu' Lo Soto' Ine' Gamazi*  
(Mataio' 23:1-36; Luka' 20:45-47)

<sup>38</sup> Izesu' aza mono' noapize ngemo imine'  
molo ti' lo line': Mono' apizi lingimaa' aveti  
monovo nene dikelizaze. Ehe' igi minilo. Inge  
nene lavolavo ha'na ha'na liki monaakumukovo'  
ngumo helaa' neivo ido' maketilo' nimonavo  
evenelite ningi ngopo'ni li-ngidilizangumukovo'  
ngumo helaa' neivo <sup>39</sup> ido' mono' numunguk-  
isi ido' noso' nite' naba nadasa ingine nene  
ve nabalitevo' minaa' ani' holomolo' minaaku-  
mukovo' nene ngumo helaa' neive. <sup>40</sup> Ido' ingine  
vene' gonoliti inite' mata'ine nene di gopo igi di  
engita igi ido' apa nite' igi gamazi ha'na ha'na  
li O'mosola laa' nave. Gamene nabau' a'mine

ve nene O'moso'mo lihime naba goloso ngemeleseive.

*Vene' Gevono' Mali'mo Ezela Minine' Inite' Muki' Nene O'moso Imine' Gamazi*  
(Luka' 21:1-4)

<sup>41</sup> Izesu' aza mono' numuno nabau' moni milaa' ani' bokisi gahevela mino evene' muki' a'mine bokisiu' moni nihulavo ninge minine'. Moni henehi ve muki' nete nene moni vai' hulika' hulika' navo <sup>42</sup> vene' gevono' goho' minine' ma aza ogo gulehe' moni ngomo seta' huline'. A'mine moni ngomo seta' nene do bizo tili (3) toea oga' neive. <sup>43</sup> Ne'mine ogavo Izesu' izipahala zuho asi lo-ngemavo ezela ikevo ti' lo lo-ngimine': Lamineto' nolo-lingimuve. Vene' gevono' goho' vene' me'mo moni huline' ne'mo nene evene' mukito' moni hulani' nene ngivile' ivosa hulave. <sup>44</sup> Ne'mine ngivile' ogo hulave luvoni' nene evene' muki' ingine moni'ine vai' lo mininguti' hulani'za aza nene noso' nite've do soto' iline' inite' gohi ma minamivo inite' mata' goho' neinguti' nene hulave lo lo-ngimine'.

## 13

*Mono' Numuno Naba Di Goloso Ilizangumu' Izesu' Lo-ngimine' Gamazi*  
(Mataio' 24:1-2; Luka' 21:5-6)

<sup>1</sup> Izesu' mono' numuno nabauti' nolimivo izipahala zuhouti' mali'mo ti' lo lo-imine': Tisazo, ningezo. Numuno mene geheni amebe gehenidunu' numuno atoli'mine lamine' goloso gizikeve. <sup>2</sup> Lavo Izesu' ti' lo lo-imine': Numuno naba mene ninge nabe. Ne'mi geheni've nene bili

ngululubizi hulikevo geheni sita' ne'minesi ma bizi minamilisasive.

*Soto' Iline' Initekumu' Izesu'ni Longo' I-dikevo Geni Mulumo Nite' Soto' Ilingumu' Nene Longimine' Gamazi*

*(Mataio' 24:3-14; Luka' 21:7-19)*

<sup>3</sup> Ne'mine lo Oliva gololo' dizo mono' numuno nabala vele ize hulo neivo Petolole Zakobole Zohanele Adeleale angisevo' mini Izesu'ni longo' i-dani': <sup>4</sup> Idi'ne laine' inite' nene nanihe' soto' ilive. Ido' a'mine gamazi nene gihile izelesa neivo noso molo nanite' nanite' soto' ilihe. Nemu' lolemezo. <sup>5</sup> Ti' li longo' i-dikevo aza api' ogo ti' lo lo-ngimine': Ve malite gotine izi lengele'mize gopo ikelizaze. Lingingine ehe' igi ningisa minilo. <sup>6</sup> Evene' muki' nete nene neni' gulive'ne igi a'mine O'moso'mo do lungu' izelive lo nimiselelesa live ma nene na'mo nouve li go'ine izi evene' muki' ngele'mize gopo ilisave. <sup>7</sup> Ido' lovo soto' neivo nigili ma ido' ebe' mala mala lovo soto' neivo ne'mi gamazi nigili ma upuho' igi golise gilamilo. A'mine inite' nene soto' oloseiha inite' vai' osu' liline' gamene naba nene a'mido' olihe soto' amive. <sup>8</sup> Ido' misubo mau' vete misubo mau' vesi lovo hizilisave. Ido' guvelesi ve naba mali'mi zuhote guvelesi ve naba mali'mi zuhosi lovo hizilisave. Misubo ato atota mimi' oka' oka' oloseive. Ido' ga'na naba helaa' gamene nevosi nene soto' oka' oka' oloseive. Venelite izipe gidilisa mulumo api' igi gili gilika' gilika' i'mi i'mi navo alinge' izipaha'ine soto' oga' neive. A'mine'mine ogo a'mine mulumo nite' soto' iline' nene ha api' iline' nenako nemu'

nene gilika' gilika' i'mi navo alinge' naza soto' olosuve. <sup>9</sup> Ido' lingine nene ehe' igi ningisa minilo. Kanisole'nido' gonito' lengele'mizi milalisave. Mono' numu'ningu' lingibililisave. Nenita gi'mizi minangumu' ve li gonito' lengele'mizi milikevo guve'inesi ve nabaliti ve'nidokisi ngamani nabaliti ve'nidokisi oti mini neze monovo'ne li soto' igi li-ngimilisave. <sup>10</sup> Ne'mine ilizani'za gamene naba olihe amivo gomu' nene mono' gamazi lamine' di hutile' igi li soto' i-ngimikevo evene' zuho ato ato' mukita voloseive. <sup>11</sup> Ido' adido' di lengele'mizi gonito' milalisa navo ma nani gamazi lolone li gatine muki' gilamilo. Lengi' gamazi nomive. O'moso'mi Sikalahu' ei' gamazi lilisanaze. Asi O'moso'mo a'mine gamenelo' gatingu' do soto' iline' gamazivo' nene lilo. <sup>12</sup> Ido' evene' nenikumu' gili ele'vole' amani' nete nene nenikumu' gili ele'vole' ave nene ngibili hililizave li gonito' ngele'mizi milalisave. Ee, mo uvo'ninge naku'ninge nilizani' netesi ido' ize'ninge me'ninge izipaha'ine zuho nilizani' netesi nene ha ne'mine ilisave. <sup>13</sup> Neni' gulive'ne di minilizangumu' evene' muki' nete nene lengikumu' goloso gililisave. Ne'mine ilizaha evene' ma nenikumu' ha gili ele'vole' igi mini huli-nidamavo gamene naba iline' nene O'moso'mo do ngu' izeleseive.

*Gamene Goloso Ma Soto' Oloseive Lo Nemu' Lo-  
ngimine' Gamazi*

*(Mataio' 24:15-28; Luka' 21:20-24)*

<sup>14</sup> Alinge' nene ebe' do goloso iline' inite' gosele' nite' goloso gehepeve ma aloseive lani' ma nene a'mida minamilido' o neine' ebeta



soto' oloseive. (A'mene gizuvoni' gamazi mene gato nogelo ma gatelinive gaza gele ngolo' lo gelezo.) Ne'mino soto' neivo niningi ma Zudaia misubo meu' nilizave lingine a'mido' geti golise golola vi halekilizave. <sup>15</sup> Ehe, a'mine gameneu' nene silibe ogo minaa' nene nominako ve ma ingine numu'ine avitasi nilizadoti' nene ihe' numu'ninguko vi inite' mata'ine a'mingu' neine' nene di vamilisave. <sup>16</sup> Ido' ming'u' nilizadoti' nene oko'nido' inite'ine dalisa tine' mili numungu' amilisave. <sup>17</sup> Agae, a'mine gameneu' nene izipaha'ine minine' venekumukisi ido' izipe amido' nizani' venekumukisi nene mo mulumo gele-ngedekuve. Ge'nebe goloso ilisave. <sup>18</sup> Luvoni' inite' nene goline gameneu' soto' ogalive li O'mosola li minilo. <sup>19</sup> Ne nanitekumu' ve. O'moso'mo inite' mata' do soto' idoti' idise none' gamenela mene mulumo alumo nite' naba ne'mine gomuta soto' amine' nenako api' ogo a'mine gamenelo' soto' oloseive. Ido' soto' ilidoti' nene alinge' gohi ma ne'mino soto' amoloseive. <sup>20</sup> Guvelesi ve'mo a'mine gamene nene mine ha'na ogalive lo bele hukolove ma lamidiniko evene' hamo' ve'inesi ma minamadine'za ei' evenele ve lo ngele'mize kegesine' evenelemu' nene gelosa a'mine gamene nene mine ha'na alive lo bele hukolosa line' ve. <sup>21</sup> A'mine gameneu' nene ve mali'mo ningilo. O'moso'mo do lu' izelive lo imiselelesa live aza mela neive lo ido' ningilo. Holela neive lo nolo-lingimivo ma nene gili imamilo. <sup>22</sup> Ido' nanitekumu' ve. Evene' ma nete soza li linge ma O'moso'mo do lungu' izeline lo nimiselelesa live nouve li ido'

linge ma O'moso'mi gamazi lo soto' oga' nouve polohete nouve li soto' igisa O'moso'mo ei' ve lo ngele'mize kegesine' evene've nene go'ine izekunivo le'metilizahe li ngele'mize gopo ilisa ato' nitekisi evene' golize laa' nitekisi di soto' igi ngelebizilisave. <sup>23</sup> Mene inite' nene olihe soto' amivosa inite' mukikumu' gomu' nolo-lingimuze. Ehe, mo gizebo lamine' igi minilo.

*O'mosolati' Ve Gihile Aline' Gamazimu' Longimine' Gamazi*

*(Mataio' 24:29-31; Luka' 21:25-28)*

<sup>24</sup> A'mine mulumo nite' soto' ogo mineline' gamene osu' lavo alinge' nene holi'mi labanala nolihiziyo ike'ni'mi labanala osu' lavo <sup>25</sup> sonohi' nene okulumokuti' di'mozi' mozi' navo okulumoku' amuzo'inesi nite' nene mo'mongo' i gese' navo <sup>26</sup> O'mosolati' ve gihile neni' nene amuzo naba do mino labana'nesi limuso avilelo' nolimuvo ningilisave. <sup>27</sup> Ne'mine ogo angelo' ngimiselekuvo vi ngele'mize kegesuvoni' evene'ne nene misubo ato atoku' mini'mi minani' ebe' mukikuti' nene moni ngele'mizi di nubo i-ngidilisave.

*Aneza Gamazi Gohuno Zalo' Lo Molo Line' Gamazi*

*(Mataio' 24:32-35; Luka' 21:29-33)*

<sup>28</sup> Ido' gohuno zalo' lo molaloni' nene gili lamine' igi gililo. Lingine Zuda veti misubotida mene gohuno zaloti' sisive ho'lavo mo ho' gamene alitave li ningi gilaa' nave. <sup>29</sup> Ido' a'mine'mine ogo a'mine nolo-lingimuvo nite' nene soto' neivo ma aza avito' ogo mo nene hetelelesa neive li ningi gililisave. <sup>30</sup> Lamineto' ma

lo-lengemeloze. Gililo. A'mine gamenelo' aleve nene ha mini olihe hili osu' lamavosi a'mine inite' muki' nene soto' ilisave. <sup>31</sup> Okulumoki misubogi nene ha vi osu' lilisasine'za a'mine gamazi'ne nene mo osu' lamo ele'vole' ogo mineleseive.

*A'mine Soto' Iline' Gamenemu' Nene Ve Hamolitesi Ma Gelamune Lo Izesu' Line' Gamazi (Mataio' 24:36-44)*

<sup>32</sup> Ne'mine o neine'za a'mine soto' iline' gamenemu' nene ve hamolitesi ma gelamune. Ido' Okulumokuko angelolesi nene gilamave. Ido' O'moso'mi gipele nazasi nene ma gelamuve. Me'neho ei' hamo' nene gele neive. <sup>33</sup> Soto' iline' gamene nene nanihe' nolihe lingine ma gilamanaze. Ehe' igi gizebo igi minilo. <sup>34</sup> Ido' ma ne'mino neive: Ve mali'mo venenga volosa numu've ebe've hulosa gelekele' izipahala inite'velo' gizebo ve hulo-ngedo hamo' hamo' nene gono ngemo gatedo' gizebo ilivemu' nene gatedo' gizebo lekeseve ilive lo lo-doosa vine' ve. <sup>35-36</sup> Numuno meleho aline' gamene nene nivenga' alihe holuka' olo'mudise alihe go' nuvonuvo neivo nehe go' lo labana' elelesa neivo nehe lingine gilamanaze. Lite' lo ogo ingi nizavo ningalize. Nemu' gizebo lamine' igi minilo. <sup>37</sup> Lengi' nolo-lingimuvoni' gamazi mene evene' mukikumukisi nene noluve. Gizebo lamine' igi minilo.

## 14

*Zuda Veliti Mono' Ve Naba Nete Izesu'ni*

*Bililizani' Gamazi Lani'**(Mataio' 26:1-5; Luka' 22:1-2; Zohane' 11:45-53)*

<sup>1-2</sup> Isilaele' aleveti avotemote Aigita misubou' minani' gameneu' O'moso'mo ise'ine izingumu' gelo holise' mino noso' nite' naa' nounge' gamene ado' lulu izamine' beleti naa' nounge' holise' nene olosa gamene seta' lumo ha neivo eveneto' medeli mini O'moso inite' lehizi-daa' ave nabasi mono' apizi ngimaa' avesi Izesu'ni analo' di bililisa gilani'za holise' gameneu' nene evene' vai' di gese' igi ningi nizavo analo' dalone' nene lovo di soto' ikelizanako holiseku' nene alamolone li zegeni analo' di bililiza akamu' vise' i'mi vi minani'.

*Betani Numuda Vene' Mali'mo Izesu'ni Uveli Leke-dine' Gamazi**(Mataio' 26:6-13; Zohane' 12:1-8)*

<sup>3</sup> Ne'mine igi nizavo Izesu' Betani numuda mino ganadise gozopo' ma gize dave Simoni' ne'mi numu'veu' dizo mino noso' nite' no neivo vene' mali'mo unuvo laminekisi uveli lamine' gehepeve meni've dizo minine' gulive nalida nene luhuvo laminekisi gehenidunu' lili' ani' botoloku' minine' nene do ogo botololi'mi velela ize si'ze hulo a'minguti' uveli nene Izesu' godolou' leke-dine'. <sup>4</sup> Leke-davo evene' linge ma nete mulu'ningu' goloso gili engiku' ti' li lani': Uveli nene nani monovomu' do labuluyo neive. <sup>5</sup> A'mine uveli nene maketi miladini sigisi hadeti Kina (K600) ivile' ivosa moni naba dadinako maketi mili meni di goho' gahali' ngimilizanako ve li elemikevo <sup>6</sup> Izesu' aza gelo ti' lo line': Huli-dilo. Aza nanite' do goloso ogavosa genivesi

gamazi nili-dave. Vene' ne'mo inite' lamine' noo-nidivo ede vive. <sup>7</sup> Nene nanitekumu' ve. Lingine nene goho' gahali' alevesi mini di vi minilizani' nenako lingine ngele'mize lamine' olone li gililizani' nene nani gamenela gililizahe a'mido' ha ngele'mize lamine' ilisani'za nezesi nene mudive ma mini di vi minamilisave. <sup>8</sup> Aza ilido' o minine' nite' nene ogave. Galese izi-nidilizangumu' nene gomu' oko'ne do lamine' o-nedo holo-nedave. <sup>9</sup> Naza lamineto' lo-lengemeloze. Gililo. Mono' gamazi lamine' mene di misubou' misubou' moni li-ngimilizadaa nene eze guvele nene ha gili minilizave li aza inite' o-nidine' nemukisi li soto' igi li-ngimilizave.

*Zuda' Aza Izesu'ni nGelebizelesa Lo-ngimine' Gamazi*

*(Mataio' 26:14-16; Luka' 22:3-6)*

<sup>10</sup> Ne'mine ogavo Izesu' izipahala zuho tuvelu engikuti' Kelioto numudoti' ve ma gulive Zuda' aza Izesu'ni ngelebizekuvo dalizave lo eveneto' medeli mini O'moso inite' lehizi-daa' ave na-bala vo lo-ngimine'. <sup>11</sup> Lo-ngemavo mulu'ningu' lamine' gili moni emelone lii li huki-dikevo aza vo Izesu'ni nene ngelebizele akamu' vise' ogo minine'.

*O'moso'mo Ise'ine Izingumu' Gili Mini Naa' Noso' Nite' Nene Izesu' Izipahala Zuhosi Nani' Gamazi*

*(Mataio' 26:17-25; Luka' 22:7-14, 21-23; Zohane' 13:21-30)*

<sup>12</sup> Zuda vete lulu izamine' beleti naa' nounge' holise' nene api' neivo O'moso'mo avotemotine ise'ine ize-ngidingumu' gele mino naa' nounge'

noso' nite' naloningumu' sipisipi angale belaa' nounge' gamenelo' nene Izesu' izipahala zuho nete ti' li longo' i-dani': O'moso'mo avotemotine ise'ine ize-ngidingumu' gelo naa' nounge' noso' nite' nene zala vo do va'va' o-gedelone lo nolane. <sup>13</sup> Likevo izipahala zuhouti' ve seta' ma nongimisele ti' lo lo-ngimine': Numuno nabala vi nihetelasivo ve mali'mo misubo somou' noso ohizo gehu navo votene' ilisaze. Lingine e'meti vilizo. <sup>14</sup> Numuno mau' dizo vavo ma a'mingu' vi numuno ne'mi melehine ti' li li-imilizo: Tisate ne'mo ti' lo lave: Nazasi izipaha'nesi O'moso'mo avotemotine ise'ine izingumu' gelo naa' noso' nite' nalone' numuno lulo nene zau' nalone. <sup>15</sup> Likesivo numuno meleho aza numuno veletu' mino gala'mudo' mino inguti' veletu' nene lulo nabasi miningu' inite' mata' avilise' i nizani' nene lengelebizeleseive. A'mingu' nene noso' nitete di va'va' ilizo. <sup>16</sup> Ti' lo lo-ngemavo izipahala seta' ingine oti numuno nabala vi heteli lo-ngimine' ma'mine ogavo O'moso'mo ise'ine izingumu' gelo naa' nounge' noso' nite' nene di va'va' asine'.

<sup>17</sup> Ne'mine ikesivo mo nivenga' molavo Izesu' aza izipahala zuho tuvelu nesi ani'. <sup>18</sup> Noso' nite' ni nizavo Izesu' aza ti' lo line': Lamineto' ma lo-lengemeloze. Gililo. Noso' nite' nonunive lengikuti' mali'mo nenikumu' me neive lo biluvaliti a'ningu' molaloseive. <sup>19</sup> Lavo ingine mulumo gili igi hamo' hamo' longo' i-dani'. Nenikumu' lamo nolosane. Olo. <sup>20</sup> Ne'mine li longo' i-dikevo aza ti' lo lo-ngimine': A'mine ve nene lapese hamokuti' nonunive tuvelu lengikuti' hamoli'mo ne'mine oloseive losa

noluve. <sup>21</sup> Ee, O'mosolati' ve gihile nenikumu' polohetelite gizi nizado' e'meto heleloni' akalo' novuvoni'za biluvalite neni' dalizave lo do soto' o-nedelive nene agae, mo mulumo gono goloso daloseinako nemu' a'mine ve aza izeleho ma gedamidiniko a'mine mulumo gono soto' o-delesa neine' akalo' nene ma mine molo minamivo lamine' o minidine.

*Izesu' Lebeni Nite' Api' Ogo nGimine' Gamazi*  
(Mataio' 26:26-30; Luka' 22:14-20; 1 Kolidi 11:23-25)

<sup>22</sup> Noso' nite' ninavo Izesu' aza beleti do O'moso opo'ni lo gito nongemo ti' lo line': Dalo. Mene neni' me'mele'ne ma ne neive. <sup>23</sup> Ne'mine lo vaini gomise do O'moso opo'ni lo ngemavo a'minguti' vaini noso ninavo <sup>24</sup> ti' lo line': O'moso'mo lo huko-lidine' gamazi nene do ele'vole' iline' vanise'ne nene evene' mukikumu' ve lo lekeloni' vanise mene neive. <sup>25</sup> Lamineto' lo-lengemelove. Naza vaini gihile'mi novozo nene gohi ma namo mino alinge' O'moso'mo gizebo o-lengedeline' gamenelo' nene a'mine novozo atoli'mine gosoho' nalosuve. <sup>26</sup> Ne'mine lavo mono' nama lisa limi heta igi Oliva golola dizi vani'.

*Izesu'ni Petolo' Ataize Lo-delingumu' Lo-ngimine' Gamazi*  
(Mataio' 26:31-35; Luka' 22:31-34; Zohane' 13:36-38)

<sup>27</sup> Dizi minikevo Izesu' ti' lo lo-ngimine': Mono' Godolou' nene O'moso'mo line' gamazi ma ti' li gizi nizani' ve: Gizebo ve'ine belekuvo sipisipi ize hutile' igi vilisave. Ti' li gizi nizani' nenako

lingine muki' huli-nidii vilisani'za <sup>28</sup> helekuvo O'moso'mo nele'mize otavo gomu' molo-lengemo nGalilaa misubouko volosuve. <sup>29</sup> Lavo Petolo' aza ti' lo lo-imine': Inginge mukito' huli-gidii vilizani'za neni' nene mo ne'mine amolosuve. <sup>30</sup> Lavo Izesu' ti' lo lo-imine': Lamineto' nolo-gimuve: Idise holuka' gehepeve nene okoloho nolo seta' olihe molamivo gaza gamene setohamo ataize lo-nedelesane. <sup>31</sup> Lavo Petolo' pigi izo ti' lo line': O'ove. Ge gibili hili nesi nibili hililisa lilizankisi nene ataize lo-gedamolosuve. Lavo izapahala zuho linge nesi a'mine'mine li osu' lani'.

*Izesu' Gesemani Za Zuhou' O'mosola Lo Mine' Gamazi*

*(Mataio' 26:36-46; Luka' 22:39-46)*

<sup>32</sup> Ido' ingine vi ebe' ma gulive Gesemani nela vi hetelikevo izipahala zuho ti' lo lo-ngimine': Naza O'mosola nololongumu' lingine melo' mito' minilo. <sup>33</sup> Ne'mine lo Petolole Zakobole Zohanenginevo' ngele'mizo novivo Izesu' mulunou' nene api' ogo hongili' hongili' ogo minivo gala muki' gilidi'mo mulumo naba gelo <sup>34</sup> ti' lo lo-ngimine': Naza mo mulu'neu' mulumo goloso ogo geni naba idi'mo heleloni' akalo' mine molokuve. Lingine melo' gizebo igi ningi minilo. <sup>35</sup> Izesu' aza ne'mine lo ngomo ma hoto'ile novo misubolo' golo hizo ongo a'mine mulumo gamene nene ivile' ogo vilido' o noline' nene ivile' ogo viliho lo ivile' ogo vilingumu' O'mosola lo ti' lo line': <sup>36</sup> Ahono me'neho make, oso' amoso' initekisi ha ilinido' o neine' nenako mulumo ekese' naani' mene do olovo' o-nedezo. Do olovo' o-nedeline'za neni' lu'nelo' amozo. Asi gei'



lukalo' ozo. <sup>37</sup> Ne'mine lo tine' molo vo okise ingi nizavo ningo Petolo'ni ti' lo lo-imine': Simoni, gaza okise ongo nabe. Gamene ngomosi vanu aua ne'minemu' ha veka ma ninge minamilinido' o nehe. <sup>38</sup> Lengemengu' milalizangu' nene gopo ikelizaze. Gizebo igi O'mosola li minilo. Ee, lutine ne'mo gono dalosa neiha okodine ne'mo nene geni o neive. <sup>39</sup> Ti' lo lo-ngemo gohi vo gomu' lidi'mino O'mosola loo <sup>40</sup> gohi tine' molo ogo ningine' nene ve'ine hihi' ogavo okise ingi nizavo ningine'. Ne'mine neivo nadive lo-emelone lii li-imiliza gamazimu' vise' igi minani'. <sup>41</sup> Gohi vosa ihe' ogo gamene setohamo ogavo ti' lo lo-ngimine': Okise ingi mini gililisa gili nizahe. Mo a'nesi' ve. Ningilo. O'mosolati' ve gihile neni' nene di soto' igi ve golosoliti a'ningu' milalizani' gamene nene mo ogaze. <sup>42</sup> Otilo. Mo volonge. Ningilo. Biluvalite dalizave lo neze do soto' ilive nene mo avito' ogave.

*Izesu'ni Analo' Di Gonito' Ele'mizi Vani' Gamazi*  
*(Mataio' 26:47-56; Luka' 22:47-53; Zohane' 18:3-12)*

<sup>43</sup> Ti' lo nolo-ngimivo a'mido' geto izipahala zuho tuvelu engikuti' ve gono'nibo Zuda' aza ogo heteline'. Ido' eveneto' medeli mini O'moso inite' lehizi-daa' ave nabasi mono' apizi ngi-maa' avesi mono' gizebo vesi mini evene' muki' ngimiselikevo bainati mitekisi gavososi davo Zudalesi maka' ani'. <sup>44</sup> Ido' olihe igi hetelami Izesu'ni do soto' o-ngidive ne'mo gomu' ti' lo lovo gize ngimine': Golo elo nalo ve nene mo a'mine ve mineleseize. Dalo. Golise valize.

Gizebo lamine' igi ele'mizi vilo. <sup>45</sup> Ne'mine losa Izesu' neida geto vo Tisazo loo golo elo nani'. Golo elo navo <sup>46</sup> maka' ave ingine ningi analo' dani'. <sup>47</sup> Ne'mine ikevo Izesulesi a'mida minaveuti' mali'mo bainati mite' gokuti' gelelehe' ogo eveneto' medelo mino O'moso inite' lehize-daa' ive nabali'mi gelekele' izipe'mi gala belo hasa' o huline'. <sup>48</sup> Ido' Izesu' aza analo' dave ti' lo lo-ngimine': Gizengize ve ma dalisa iga' adi'mine igi bainati mitekisi gavososi di neni' dalisa ahe. <sup>49</sup> Naza gamene gamene mono' numuno nabau' linginesi maka' mino mono' apize ngemaa' uvoni' malo' nene a'nelo' damani' nehe. A'mine gamene malo' a'nelo' dami mini idise mene dani' nene mono' godolou' gizi nizani' gamazi ma nene gihile izeline' nenaze. Ha ne'mine ilo. <sup>50</sup> Ne'mine lavo izipahala zuho muki' huli-di golise vani'. <sup>51</sup> Golise vikevo goso've ma lavolavo mokonokovo' liko e'meto novivo ezesi dani'za <sup>52</sup> lavolavolokovo' dikevo lavolavo apase hito baka' golise vine'.

*Kanisoletiti Ve'nido' Izesu'ni Goni' I-dani' Gamazi*

*(Mataio' 26:57-68; Luka' 22:54-55, 63-71; Zohane' 18:13-14, 19-24)*

<sup>53</sup> Ido' Izesu'ni ele'mizi eveneto' medelo mino O'moso inite' lehize-daa' ive naba neida vani'. Ne'mine ikevo eveneto' medeli mini O'moso inite' lehizi-daa' ave naba mukikisi mono' apizi ngimaa' avesi mono' gizebo vesi muki' di gese' ani'. <sup>54</sup> Izesu'ni ele'mizi nivavo Petolo' aza hoto'ile e'mete-do ogo heta minamo a'mine dizi minani' numuno nene vodo vodo ogo minavo oluso' misubo vovo haza minido' gelekele' izipe

olo' gizi lahizi minangukisi hozi dizo vovo'ningu' mino olo' lahizo minine'. <sup>55</sup> Ne'mino neivo eveneto' medeli mini O'moso inite' lehizi-daa' ave nabasi Zuda veti kanisole vaikisi mini nani lihimemu' Izesu'ni bebelone li lihime've li soto' ilizavemu' vise' ani'za <sup>56</sup> evene' muki' soza saza gamazi likevo gamazi'ine vo hamo' amivo bililizado' o minine' gamazi ma di soto' amani' ve. <sup>57</sup> Ne'mine ikevo malite oti soza saza gamazi ezemu' ti' li lani': <sup>58</sup> Aza ti' lo livo gilune' ve: Mono' numuno naba mene evene' a'inedunu' gizani' nene izo kuso gamene setohamo ogavo gohi ma evene' a'inedunu' gizamilizani'za neni' lokuvo soto' oloseive. <sup>59</sup> Ti' lo live li lani'za engi' gamazi nene vo hamo' amivo <sup>60</sup> eveneto' medelo mino O'moso inite' lehize-daa' ive nabali'mo vovo'ningu' ote mino Izesu'ni longo' o-do ti' lo line': Gaza nilani' gamazilo' mene do velepe' izo lo-ngemeline' gamazi ne nomihe. Mene ve nete geikumu' nilani' gamazi nene gelanivo nadi' o neive. <sup>61</sup> Ti' lo longo' o-dine'za aza vele bizo mino gamazi ma do velepe' izo lo-emamine'. Ne'mine amivo eveneto' medelo mino O'moso inite' lehize-daa' ive naba aza gohi longo' o-do ti' lo line': Gulive do hozi laa' nounive O'moso ne'mi gipele do lu' ize-live lo imiselelesa live ma nene gei' ne nabe. <sup>62</sup> Ne'mine lo longo' o-davo Izesu' aza ti' lo line': A'mine ma nene nouve. Ido' O'mosolati' ve gihile naza nene amuzo'vesi minive O'mosoloti' lemo nouvoni' nenako nemu' ana hulaa' ida mito' nouvo ningilisave. Ido' Okulumoto' limuso avilelo' nolimuvo ningilisave. <sup>63</sup> Lavo eveneto' medelo mino O'moso inite' lehize-daa' ive naba ne'mo Izesu' aza O'moso ivile' olosa gamazi

goloso lihe lo gala giline' nene ngelebizelesa asi've ngolokine' genegana've nene do nohikelo ti' lo line': Lihime've li soto' ilizavemu' nene gohi nanimu' vise' olone. <sup>64</sup> O'moso ivile' o-do gamazi goloso line' nene langisetine mo gilikeve. Nemu' lingine gilikevo nadi' o neive. Lavo ingine mukito' ti' li lani': Aza nene mo lihime naba daanako mo helelido' ogave. <sup>65</sup> Ne'mine likevo malite gituhu' i-di velelo' hiti mini a'ine gavoso nibili ti' li lani': Zaho nogibilihe. Gaza polohetelite laa' adi'mine ogo lo soto' ogo lo-lemezo. Likevo gelekele' izipe nete Izesu'ni di a'ine gatapa' gavoso bilani'.

*Petolo' Izesu'nimu' Ningamuve Ve Lo Ataize Line' Gamazi*

*(Mataio' 26:69-75; Luka' 22:56-62; Zohane' 18:15-18, 25-27)*

<sup>66</sup> Ne'mine igi nizavo Petolo' aza numuno vodo vodo ogo minavo oluso' omo' naba minido' gala'muda neivo eveneto' medelo mino O'moso inite' lehize-daa' ive nabali'mi gelekele' alu mali'mo ogo <sup>67</sup> Petolo' nene olo' lahizo neivo ningo ninge lamine' ogo ti' lo line': Gazasi nene Nasalete ve Izesukisi minaa' asive ma nene nane. <sup>68</sup> Ti' lo line'za aza o've lo gaza laine' gamazi nene gelamo a'mine'mi monovosi gele lamine' amuve line'. Ne'mine loo gateda lemo vo minine'. <sup>69</sup> Minavo gelekele' alu ne'mo gohi eze ningo a'mida minave gohi lo-ngimine': Mene ve nene a'mine zuhouti' ma ne neive. <sup>70</sup> Lavo gohi ataize gehepeve line'. nGomo lasolo ma nimini a'mida minave nete Petolo'ni ti' li li-imani': nGalila-ialati' nainako gaza nene mo lamine' eze zuho

nane. <sup>71</sup> Ne'mine likevo aza gosoho' noluvo ma O'moso'mo usi' ize-nidivo loo lamineto' noluve. O'moso'mi velelo' lo huko noluve lo ti' lo line': Lngine naza ma ningo gelamuvemu' nilave. <sup>72</sup> Lavo okoloho ne'mo a'mido' geto nolo gohi ma molavo gamene seta' ine'. Ne'mine ogavo Petolo' aza Izesu' lo-imine' gamazi nene okoloho nolo gamene seta' olihe molamivo gaza gamene setohamo nenikumu' ataize lo-nedelesane lo line' gamazi nene gohi gelo ive naba goloso ine'.

## 15

*Izesu'ni Ele'mizi Vi Pilatodo' Goni' I-dani' Gamazi*  
(*Mataio' 27:1-2; Luka' 23:1-5; Zohane' 18:28-38*)

<sup>1</sup> Nedenga' go' nolivo eveneto' medeli mini O'moso inite' lehizi-daa' ave nabasi mono' gizebo vesi mono' apizi ngimaa' avesi kanisole muki' nesi ingine lovo gizi gamazi li huki Izesu'ni analo' nala' di-di ele'mizi vi Pilato' anau' milani'. <sup>2</sup> Ne'mine ikevo Pilato' aza longo' o-do ti' lo line': Gaza nene Zuda veti guve'inesi ve naba nabe. Olo. Ne'mine lo longo' o-davo ti' lo lo-imine': Mo gasika nene nolaine' ve. <sup>3</sup> Lavo eveneto' medeli mini O'moso inite' lehizi-daa' ave naba nete inite' mukikumu' goni' i-dikevo <sup>4</sup> Pilato' ti' lo gohi longo' o-dine': Inginge ne'mine mana'mine nitekumu' goni' nogidune li inite' mukikumu' nilani' nene gele nabe. Nemu' do velepe' izo gamazi gaza ma lo-ngemeline' nomihe. <sup>5</sup> Ne'mine lo longo' o-dine'za Izesu' aza gamazi gohi ma do velepe' izo lamivo Pilato' aza gala muki' giline'.

*Izesu' Helelive Likevo Pilato' Gele nGimine' Gamazi*

*(Mataio' 27:15-26; Luka' 23:13-25; Zohane' 18:39-19:16)*

<sup>6</sup> Kilisimasilo' kilisimasilo' O'moso'mo Zuda veti avotemotine ise'ine izingumu' gelo holise' minaa' une' gamenelo' gamenelo' nene Zuda ve nete galapuso ve muki' minanguti' nene hamo' ma heta vilive li gulive ikevo Pilato' aza a'mine ve nene nala' numunguti' hulo heta o-ngedaa' ine' ve. <sup>7</sup> Ido' ve malite ngamani lovo ngimi evene' ngibilavo galapuso numungu' huli-ngidikevo a'mine gamenelo' nene inginesi a'mingu' minani'. A'mine veuti' nene ve ma gulive Balabasi' minine'. <sup>8</sup> Minine' nenako evene' muki' di gese' igi Pilato' neida vi kilisimasilo' kilisimasilo' oga' ine' ma'mine ogo evene' ma hulo heta o-delive li longo' i-di minikevo <sup>9</sup> Pilato' aza do velepe' izo ti' lo longo' o-ngidine': Lengi' Zuda veti guvetinesi ve iseve izo hulo-delongumu' nilahe. <sup>10</sup> Ido' ne'mine lo longo' o-ngidine' nene evene' vai' Izesu'ni e'metani' nenako nemu' eveneto' medeli mini O'moso inite' lehizi-daa' ave naba nete ezemu' mulu'ningu' goloso gilii nemu' gonito' ele'mizi milikeni' neivo nemu' Pilato' aza ningo gelo longo' o-ngidine' ve. <sup>11</sup> Ti' lo line'za eveneto' medeli mini O'moso inite' lehizi-daa' ave naba nete evene' muki' ga'ine di a'mine vemu' lami Balabasi' ve lilo likevo a'mido' gili ngimi Balabasi' ve lani'. <sup>12</sup> Ne'mine likevo Pilato' aza gohi longo' o-ngedo ti' lo line': Zuda veti guvetinesi ve ve lave nene nadi' o-delove. <sup>13</sup> Ti' lo longo' o-ngedavo di velepe' izi gamazi nabauti' ti' li lani': Gaza lanivo lohoto' zalo' bili

hililizave. <sup>14</sup> Likevo Pilato' aza ti' lo lo-ngimine': Nanitekumu' lohoto' zalo' belelone. Inite' goloso ine' nene nanite' nolive. Ti' lo lo-ngimine'za ingine amuzo mili lohoto' zalo' bele'navo li gohi geligelinga lani'. <sup>15</sup> Ne'mine likevo Pilato' nene eveneliti mulu'ine do hongu lo Balabasi'ni hulo heta o-davo engita vine'. Ne'mine ogo Pilato' aza lavo ngibilaa' ani' gavosodunu' Izesu'ni mehene izivi' ledivi' igi bilikevo di vi lohoto' zalo' bililizave lo Loma veti ami pilisi ve neti a'ningu' molani' ve.

*Amilite Izesu'ni Golo Izani' Gamazi*  
(Mataio' 27:27-31; Zohane' 19:2-3)

<sup>16</sup> A'ningu' molavo ele'mizi ngamanilo' gizebo ve nabali'mi numuno oluso' misubo vovo minido' vii ami lingela asi li-ngidikevo ikevo <sup>17</sup> gulehe' lavolavo guve'inesi vetevo' ngilaa' ani' ne'mine ma oko'nolo' di ngili-di uhoni nala' nene di gangi guve'inesi ve nabalitevo' madu'nido' gihaa' ani' nite' ne'mine ma apa nite' igi lili' igi gihi-di <sup>18</sup> api' igi geke' voke' li-dika' li-dika' igi mini Zuda veti guve'inesi ve naba ma nene gopo'ni nolo-gidune lii <sup>19</sup> angabadunu' godololo' bilaa' bilaa' ido' gituho' i-daa' i-daa' ido' gubi' izi imaa' imaa' igi golo izi minani'. <sup>20</sup> Ne'mini golo izani' nene osu' lavo lavolavo gulehe' nene apasi di huli-di ei' oko'nolo' inite've nene gohi di izi-di lohoto' zalo' bililisa ele'mizi vani'.

*Izesu'ni Lohoto' Zalo' Bilani' Gamazi*  
(Mataio' 27:32-44; Luka' 23:26-43; Zohane' 19:17-27)

<sup>21</sup> Ne'mine igi nivavo ve ma gulive Simoni' aza Kilene ebetoti' ve Alekisadeki Luhuki me'nibo

aza Zelusalemi tauni hetati' a'mingu' dizo volosa navo votene' igi Izesu' lohoto' za'velo' nene gehe-delive li amuzonga li-dikevo gehu vine'.  
<sup>22</sup> Ne'mine ogavo Izesu'ni ele'mizi vi ebe' ma gulive Goligota nene leze gamaziuti' nene godolo amuzo ebe' ve lado' nene vi heteli <sup>23</sup> vaini nosou' mulumo gilamaa' inite' gulive mula nene di gopo igi imani'za namine'. <sup>24</sup> Namivo lohoto' zalo' nilidunu' bilisa genegana've nene ize' mili dalisa do nado ize' molalane li zohi' igi geheni mulo ngomo ma hulika' hulika' ikevo ngivile' igi hulave nete dika' dika' ani'.

<sup>25</sup> Ho' olihe amuzo nomolavo 9 kiloku ne'mido' nene zalo' bili di otani'. <sup>26</sup> Ne'mine ikevo goni' i-dani' lihime li soto' igi luhuvo ti' li gizikevo minine': Zuda veliti guve'inesi ve naba ve. <sup>27-28</sup> Ido' gizengize ve seta' ezesi maka' lohoto' zalo' ngibili ma ne ana zamela di oti-di ma ne ana adavala di oti-dani'. <sup>29</sup> Ne'mine ikevo evene' igi vigi ave nete ungumu' ungumu' izi gize' i-di ti' li lani': Oho, mono' numuno naba izo kuso gamene setohamo novivo gohi gize'love laa' anive gaza <sup>30</sup> gei' okonga nene do gu' izo lohoto' zaloti' nene apaso lemevo. <sup>31</sup> Nilavo eveneto' medeli mini O'moso inite' lehizi-daa' ave nabasi mono' apizi ngimaa' avesi a'mine'mine igi gize' i-di li volelo' melo' igi ti' li lani': Aza evene' linge ma nene do ngu' izive lani'za ei' oko'no nene ngelo do u' izamiline' ogave. <sup>32</sup> O'moso'mo Isilaele' ve do lu' izelive lo imiselelesa live leli' guvetesi ve naba noline' nene lohoto' zaloti' lemelve. Ne'mine ogavosa laza ningo ezemu' gele ele'vole' olone' nenako ve li lani'. Likevo lohoto' zalo' maka' ngibilave sita' nesi a'mine'mine igi gamazi goloso



li-dasine'.

*Izesu' Hiline' Gamazi*  
(*Mataio' 27:45-56; Luka' 23:44-49; Zohane' 19:28-30*)

<sup>33</sup> Ido' tuvelu (12) kiloku ogavo neloti' nene ebe' mukiku' liti'muso ize gese' ogo mine do vo tili (3) kiloku nivenga' ogavo gohi labana' iline'. <sup>34</sup> Ido' tili kiloku ogavo Izesu' aza amuzo molo asi naba lo ti' lo line': Eloi Eloi lama sabahatani. Leze gamaziuti' ne'mi monovo nene ne'mino neive: O'mosoo, O'moso'ne make, nanitekumu' hulo-nedane. <sup>35</sup> Lavo eze minine' gahevela minave linge ma nete nene gili ti' li lani': Gililo. Polohete Elia'nimu' asi nolive. <sup>36</sup> Likevo ve mali'mo nosou' lupizisa lipi naa' ani' inite' ma do ekese' oga' ine' vaini nosou' lupizo vai' lavo viliki' viliki' lo nalive lo ngongo'nolo' izo noemo ti' lo line': Elia' lemo apase-delihe ninge minelone. <sup>37</sup> Lavo Izesu' asi naba lo ahui' do dizo hulo hiline'. <sup>38</sup> Nohilivo mono' numuno nabau' izi hukikani' lavolavo nene veletati' gala'muda limivo izo ho'lo seta' ine'. <sup>39</sup> Izesu' ahui' do dizo hulo nohilivo ami pilisi veliti gizebo ve'ine naba ma Izesu' velela ote minive ne'mo ningo ti' lo line': Ve mene lamineto' mo O'moso'mi gipele minani' neive.

<sup>40</sup> Ido' vene' linge ma nene hoto' gidini mini ningi minani'. A'mine vene' muki' minangu' nene Mangadala numudoti' vene' Malia' nesi ido' ei' abalaho ado' Zoseki ido' Zakobo' ngomogi netise ize'nibo nesi ido' Salome' nesi nene maka' minani'. <sup>41</sup> Ingene nene Izesu' nGalilaia misubola mono minido' e'meti moni hize ele' i-di maka' minani' vene' minani'. Ido' vene' linge muki'

Izesulesi Zelusalemi numuda dizi ani' vene' nesi nene maka' minani' ve.

*Izesu'ni Galese Izi-dani' Gamazi*  
(Mataio' 27:57-61; Luka' 23:50-56; Zohane' 19:38-42)

<sup>42</sup> Nivenga' molavo holisekumu' inite' di va'va' ani' gamene nene a'mido' geto osu' lo holise' minaa' ani' gamene nene olosa neivo nemu' nene <sup>43</sup> Alimataia numudoti' ve Zosehe' aza evenelite gilavo dizo minavo gili imaa' ani' kanisole mino ido' O'moso'mo eveneto' gizebo iline' gamene alingumukovo' nene gizebo ogo minaa' ive ne'mo aza ehelele izine' nene gele hulo Pilatoda vo Izesu' oko'no nene nemelive lo longo' o-dine'. <sup>44</sup> Longo' o-davo Pilato' aza mo Izesu' hilihe lo gala seta' gelo ami pilisi veliti gizebo ve naba asi lo-davo ogavo Izesu' mo helahe lo longo' o-dine'. <sup>45</sup> Longo' o-davo mo helave lavo gonoso nene Zosehe'ni do vilive lo lo huko-davo <sup>46</sup> aza lavolavo mokono' lamine' ma vo meni hizosa Izesu'ni nene lohoto' zaloti' apaso do lemo a'mine lavolavodunu' asabu' ize-do gonoso milaa' ani' ebe' lili' igi gehengu' golo'vatikangu' nene do vo molo-do gonoso galese velelo' nene geheni naba ma do velehe' molo do tilekine'. <sup>47</sup> Galeseu' nomolo-divo Mangadala numudoti' vene' Maliakisi ido' abalaho Zose' izelehosi engi' nene ningi minasine'.

## 16

*Izesu' Hilinguti' Otine' Gamazi*  
(Mataio' 28:1-8; Luka' 24:1-12; Zohane' 20:1-10)

<sup>1</sup> Gohi nivenga' molo sigisi (6) kiloku ogavo holise' nene mo osu' lave li Mangadala numudoti' vene' Maliakisi ei' abalaho Zakobo' izelehosi Salomekisi gonosolo' holalone li unuvo lamine' oga' ine' uveli nene vi meni hizani'. <sup>2</sup> Meni hizi di vi ingi Sadeu' go' lolosa neivo gonoso ebeta vani'. <sup>3</sup> Nivi ti' li li volelo' melo' i'mi vani': Gonoso galesa velelo' geheni naba ma nene zaho do velehe' molo hulo-ledelive. <sup>4</sup> Ti' li'mi visa ningi huli gonoso galesela milani' nene a'mine geheni naba goloso ma nene velehe' mili hulikeni' neivo ningani'. <sup>5</sup> Ne'mine igi gonoso mili-dani' geheni muliku' dizi ningani' nene gosove ma saketi mokono' ha'na ha'na izo a'ine hulaa' ada mito' neivo ningi ngehelele izine'. <sup>6</sup> Ne'mine neivo nizavo ti' lo lo-ngimine': Lengehelele izamivo. Nasalete ve Izesu'ni lohoto' zalo' bilave ma nene ningilisa ahe. Aza nene meu' nomive. Mo oto vase. Mili-dani' ebe' mene ningilo. <sup>7</sup> Nemu' lingine vi izipahala zuhosi ido' Petolo' ei' nesi nene nGalilaia misubouko gomu' molo lengemo volosuve lo lo-lingimine' ma'mine ogo vo neivo a'mida vi ningilisave li li-ngimilo. <sup>8</sup> Ne'mine lo lo-ngemavo luvoluvo izi gopo ga'ine gili mini heto' limi gonoso ebetoti' golise vani'. Ido' ngehelele izine' nemu' nene ve masi vetete' igi li-ngimamani'.

*Izesu' Aza Mangadala Numudati' Vene'  
 Malia'ni Nene Soto' Pize Imine' Gamazi  
 (Mataio' 28:9-10; Zohane' 20:11-18)*

<sup>9</sup> Zuda velite gono do do vaa' une' gamene api' neivo Sadeu' nedenga' go' nuvonuvo neivo

Izesu' nene hilinguti' otosa sikalahu' goloso seveni lulouti' ngimisele do huline' vene' Mangadala numudoti' vene' Malia'ni nene gana' soto' pize imine'. <sup>10</sup> Soto' pize emavo aza nene vo Izesulesi monaa' ave nene mulumo alumo gili-di ive nama igi nizavo lo-ngimine'. <sup>11</sup> Hilinguti' oto ha neivo ninguve lo lo-ngemavo ingine line' gamazi nene gili ele'vole' amani' ve.

*Izesu' Aza Izipahala Zuhouti' Ve Seta' Ma Soto' Pize nGimine' Gamazi*  
(Luka' 24:13-35)

<sup>12</sup> Ne'mine ogavo alinge' nene engikuti' ve seta' nene numuno ebe' naba nene huli ebe' ngomola nivasivo Izesu' aza ei' emeni do atoli'mine ogosa soto' pize ngimine'. <sup>13</sup> Soto' pize ngemavo ingine tine' mili vi ingi zuho linge nene li-ngimasine'za nesi gili ele'vole' amani' ve.

*Izesu' Izipahala Zuho Soto' O-ngemo Gono Dalizangumu' Lo-ngimine' Gamazi*  
(Mataio' 28:16-20; Luka' 24:36-49; Zohane' 20:19-23; Aposolo' 1:6-8)

<sup>14</sup> Alinge' nene izipahala zuho leveni (11) di gese' igi noso' nite' ni nizavo engitasi soto' pize ngemo ti' lo ngelemine': Hiluvonguti' nene mo ote nouvo ningave nete a'minemu' li-lingimani'za lingine lutine hize tilavo a'manapa igi engi' gamazi nene gili ele'vole' amave. <sup>15</sup> Ne'mine lo ngelembosa ti' lo lo-ngimine': Lingine numudo' namado' misubou' misubou' vi osu' li evene' zuho ato ato' muki' nizani' nene mono' gamazi lamine' nene li soto' igi li-ngimilo. <sup>16</sup> Li-ngimikevo gili gamazi gihile ve

li gili ele'vole' igi mono' noso hilalizave nene O'moso'mo golosouti' do ngu' izeleseiha ve ma gili ele'vole' amilizave nene O'moso'mo goni' o-  
ngedo lihime ngemeleseive.

<sup>17</sup> Ido' ingine nezemu' gili ele'vole' i minilizave nene neze amuzo ne'minisa di soto' ilisave: Ado' sikalahu' goloso neni' ve'nemu' ngimiseli hulil-  
isave. Ido' ato ato' no'ninguti' gamazi lilisave.

<sup>18</sup> Ido' gosihe' nene ngibilamavo a'inedunu' nene ha dalisave. Ido' zahemedede noso nalizani' nene ma do goloso o-ngedamoloseive. Inite' gizi daveti oko'nido' a'inetunu' hitikevo lamine' ilisave.

*O'moso'mo Izesu'ni Okulumokuko Ele'mizo  
Dizine' Gamazi*

*(Luka' 24:50-53; Aposolo' 1:9-11)*

<sup>19</sup> Guvetesi ve Izesu' aza ne'mine lo mo lo-  
ngemavo O'moso'mo Okulumokuko ele'mizo do dizavo O'mosoloti' lemo minidi'mo O'moso'mo ana hulaa' ida mo'mosi'velo' mito' neive.

<sup>20</sup> Ne'mino neivo eze izipahala zuho ingine numudo' namado' vi eze gamazi nene li soto' igi nili-ngimavo gamazi laa' ani' nene gihile izave li ningilizave lo Guvelesi ve aza inginesi mino hize ele' o-ngidivo ingine amuzo nite' ato ato' igi mili minani' ve.

**MONO' GODOLO GOSOHO'**  
**The New Testament in the Dano (Upper Asaro)**  
**language of Papua New Guinea**  
**Nupela Testamen long tokples Dano (Upper Asaro)**  
**long Niugini**

copyright © 1989 Wycliffe Bible Translators, Inc.

Language: Dano

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-24

---

PDF generated using Haiola and XeLaTeX on 21 Feb 2024 from source files dated 31 Aug 2023

76c78bc1-63e6-5f61-a363-169051cfe72e